

鄧伯言玉筍集叙

世謂文章有臺閣山林之殊故其氣有溫潤枯槁之
異文章固然詩之為道亦猶是也余獨謂詩之作也
有正變焉正固為盛至於情發於聲止乎禮義又變
之不失其正者也情之所發言辭出焉聲之所止禮
義存焉故氣應乎外情發乎中若功業加于民聲光
昭於時則其氣自壯和順積乎中英華見乎外則其
情自宛氣可以學而為情不可以強而至魯謂山林
之不可為臺閣臺閣之不可為山林乎譬之大羹玄



酒醇醪雋永查梨萍菹淡腴酸澁食者各適於口而其出於自然者蓋不以氣而以情也余友鄧君伯言行純而學優才美而志遠少力於學壯而未行老於風騷乃有所得其為詩歌每出人意表簡而不踈直而不俚其間道氣運之盛衰論人事之得失徃々從容不迫而意已獨至使接踵陶韋間未見其大相遠也視所謂山林枯槁者蓋不侔矣是果氣使之然歟抑情乎哉嘗示余以所為玉筍集數百篇且求為序余因諷味有感焉嗟夫今之於詩道者或氣滿志得則不暇以為或羈愁窮困則不得以為若君者學於少得於壯成於老富貴榮達之心雖淺而溫柔敦厚之度愈深是果詩之幸歟其亦君之幸也歟將見由變而之正由山林而之臺閣所謂宣宮商諧金石以鳴 國家之盛者未必不在於君也吾老矣幸獲見之尚當有徵斯說姑以是為序洪武乙卯七月既望臨川老友蠖閣道人何淑書

觀鄧君伯言詩如春風林塢卉木鮮麗泉石清冷時

禽響答自然天趣有動人處繇其好尚之專且久也
推是心以往何事不可求使居通都大邑觀乎明堂
郊廟之制作則又將有得發而為金鐘大鏞之音矣
古有大史采詩以觀民風設今有之則君之五言冲
澹中多古意歌謠善諷切最近人情有足采者矣尚
勉焉以俟洪武丙辰之歲子月下澣前承事郎監察
御史丁節子堅書

余老處巖谷諸賢以詩貶余者亦多矣及觀鄧伯言
父玉筍集為之竦然知其得之天趣異於強作之者
也詩之搜羅以為富雕繪以為妍索幽以為竒放情
以為豪若是者工則工矣謂得古作者之意則未也
伯言之所造蓋已深故冲澹自然華不為媚竒不近
怪雄不至放求合典則故宜然者哉前御史丁君子
堅評其詩謂其好尚之專且久故清麗自然使居通
都大邑觀明堂郊廟之盛發而為金鐘大鏞之音又
當不止於是斯誠不易之論余雖欲加之一辭未有
能過之者也雖然伯言吐其胸中之竒以攬夫玉筍

古今論詩以平淡為貴然欲造平淡者非工夫深至不能也晉陶淵明唐韋應物柳子厚三家世所謂詩之平淡者也以今觀之狀難寫之景於目前含不盡之意於言外其風調高古而辭旨簡遠有非區々模擬所易到誠可謂深造自得者歟或者以淺近視之是猶見玉器之天成而以為無事乎椎鑿也其可乎哉余至永豐之三年間新塗鄧伯言氏工於詩而未之見也一日其友徐伯澄來示其所著玉筍集且曰伯言恬退之士於書無所不讀然皆用以資為詩其用心勤矣舍於同里黎季敏氏垂十年而情好甚篤也季敏尚友而好義又深知詩將率同志裒其所著命工鋟梓以傳於永久國家圖書館, NATIONAL CENTRAL LIBRARY, TAIWAN, R.O.C.蘄一言以為引余讀其詩大抵清遠條達不為險艱藻繪之語澹泊和平而無忿懣哀怨之意蓋其情性然也抑亦工夫深至造於平淡之域嗚呼其亦有得於三家之風調者乎雖然余何足以知伯言昔者歐陽公曰知聖俞者無如修然聖俞所自負者皆修所不好聖俞所卑下者皆修所

稱賞夫以歐梅之知而酸醜異好有如此者而况淺
見薄識之士乎余何足以知伯言獨愛伯言用心之
勤而喜季敏能成人之美也故為書於篇首而授伯
澄使歸之洪武二十二年春正月下澣會稽山人戴
正心序

刻楠丹楹絢日明雕盤散出五侯鯖何如清廟歌周
雅器用陶匏薦大羹

前北平省檢校謝觀叔賓

鄧伯言玉筍集卷之一

四言

勤有齋銘

民生在勤，則不匱我思。古人實獲我心，乾之夕惕。
君子法之攸，為善聖賢同歸。朝斯夕斯，勤學不息。
悅我詩書，芥視金璧。人多逐利，惟義是從。人多偷安，
日省厥躬。先知艱難，後乃可逸。佩服訓辭，始終不失。

題王氏可逸堂

其孫永安求賦堂扁，乃三十八代天師所

書

人生在勤，乃可逸。動靜有常，起處獲吉。懷哉爾祖，善行美質。樂彼丘園，安此居室。安此居室，既幽且閑。或漁於溪，或樵于山。漁樵之業，奔競所棄。爾祖樂之，傲俗忘世。風流既遠，堂構猶存。居之永安，宜其後昆。

蘭雪堂銘

乾坤清氣，人物所鍾。幽蘭灑雪，虛室生風。蘭有芳馨，雪乃潔白。孰能比之君子之德？君子之德，薰陶以成。我銘斯堂，世守幽貞。

五言古詩

擬古九首

鴻蒙昔未判，道在虛無間。一從開闢始，二氣乃循環。物各一太極，人心胡不然。聖神立綱常，足以萬世傳。

其二

龍馬負河圖，鳳鳥鳴岐山。羲文有聖德，祥瑞出世間。自從衰周來，古道日凋殘。是以魯中叟，已矣發長歎。

其三

夷齊聖之清，天地鍾間氣。仁哉讓國心，忠矣諫伐意。

首陽雖餓死萬古終無愧俯仰懷高風吁嗟勸來世

其四

魯君昔好賢致幣顏闔家寧知賢者心視此猶泥沙
一瓢自可樂萬鍾我何加雲山竟長往此道誰疵瑕

其五

顏回在陋巷所樂非簞瓢仲蔚守蓬蒿素心甘寂寥
斯濫豈我志固窮非一朝懷哉松柏姿歲寒終後凋

其六

賢哉楚大夫何事沉汨羅懷王信謬佞吾道成蹉跎
守義死亦足偷生辱何多湘流若有恨千古作迴波

其七

四皓居商山名聲滿天下一出定漢儲仍作肥遯者
谷中有芝草門外無車馬俯仰思若人富貴視土苴

其八

淵明守道者衆妙藏心胸讀書不求解吟詩不求工
得酒兀然醉何曾計窮通斯人去已久舉世高其風

其九

山中有逸民峩冠大布衣悠然對松菊飲酒和陶詩

落落忘世事嬉嬉如小兒超然慕太古猶將問庖羲

寄石門梁先生求刪近藁

聖人刪古詩足以垂勸戒愧我芻蕘言存之欲奚待
弱齡事蟲魚于茲三十載冲澹苦未到綺麗非所愛

覺衰頹拊卷增嘆慨陶韋邁前修虞范鳴近代
潢汙耻溟渤丘垤等衡岱欲進力未能備錄意有在
詩家有宗匠後學恒倚賴蕪田藉鋤耘廢金假爐鞴
乾坤固悠久海宇亦弘大獨立回天風冷然響竽籟

題古文劉觀瀾潛默齋

天道固不言化機恒自然潛心悟至理以默守吾玄
回也豈誠愚賜給徒為便始知聖賢學妙在心相傳
劉君事藏修築室文水邊焚香靜對易慕道尤精專
為賦潛默詩三復其勉旃

題何同德獨善齋

兼善固所欲賦命有窮通獨善匪傲世舍義將焉從
侃侃同德父學積于厥躬守已無外慕養氣恒內充
岩穴託冥棲幽軒眄筠松陶然有真樂俛仰天地中
豈徒善一身庶幾厲澆風

題陳敏求有裕堂

紛々名利場局促若韉鎖君子恒裕如進退無不可
構堂面溪山治地種花果無言以忘世所守惟在我

題一素齋

古道日凋喪斯人慕淳風誼囂厭城市結宇雲蘿中
戶牖不丹堊門閭任蒿蓬但知琴書樂寧憂簞瓢空
來往有賢士品題多鉅公清風動修竹白雲在高松
終始慎一素令譽垂無窮

題靜寄軒

開軒納虛曠默坐觀無始身外忘世紛靜中究玄理
棲禽託深林潛魚在淵水與物兩悠然勞生念行子
知止軒為謝伯安賦

鳥雀依叢篁鯨鱉在淵水飛潛各自適所貴在知止
攸物尚知止况人為物靈勗君止於善庶以善自名

題黃氏清嘯軒

異境何幽偏羣山甚竒峭中有閒居人憑軒發清獻
聲聞忽半嶺響答復千竅颯々陰風來啾々老猿呌
脩然塵外想允矣靜中 千載蘇門生惟君可同調

題謝士彥草池書館

開軒瞰清池，光滿懷抱東。風扇微暄，一夕生春草。
冥觀造化心，頗悟聖賢道。簡編時卷舒，相義得深討。
猶憶夢西堂，君家舊文藻。

題何幼恭雲門歸隱圖

朝遊金陵館，暮憶雲門山。誰知軒冕榮，不及樵蘇閑。
歸來看瀑泉，興在陰崖間。松風有清響，古琴不須彈。
冉冉白雲起，翩翩孤鶴還。超然出塵網，似覺非人寰。

題黎氏滄洲圖

滔滔大江水，冉冉滄洲雲。蘭杜有香氣，莓苔無垢氛。
數家臨絕岸，一艇橫通津。漁唱落霞晚，鳥啼芳樹春。
對景闋圖畫，樂哉棲遯人。

耕樂為黃從禮賦

鳴鳩鳴高樹，科斗散平池。甘澤既已足，播穀當及時。
俛焉佩古訓，服田不知罷。躬耕寧為恥，所樂實在茲。
豐年黍稌登，庶用給公私。匏樽湛香醪，彘肩亦以肥。
農談共隣叟，鼓腹常熙熙。人生貴力本，汲汲將奚為。
陶然上皇逸，載誦豳風詩。

題胡志同雲松巢

高風慕太古喜結雲松巢
食松復食柏茸雲如茸茅
氤氳翠色合渾淪元氣包
謫仙本同志巢父為舊交
微起拜龍袞乞歸吹鳳匏
還將御賜筆挂在凌雲梢

盤泉為李原初賦

盤中有真樂君子恒慕之
徑轉得幽處泉流無盡時
潭深老龍蟄藻密潛鱗依
俯瞰照鬚髮渴飲清骨肌
忘情或漁釣洗耳無是非
吾才匪韓子愧爾來徵詩

題謝氏堅白齋

堂東有白石堂西有白石
堂南有白石堂北有白石
團名天成光彩眩玉色
煮之可充饑拂之可為席
磨涅不磷緇宜比君子德
若人好斯堂因之扁堅白

題宋彥輔梅屋

幽人愛孤芳貞白比冰玉
寂寞竹籬間相依結茅屋
久香似無聞一清如可掬
不有鐵石心誰能伴幽獨

鵝溪釣叟為陳克賓賦

前林帶溪水湛湛寒潭深
垂綸不設餌魴鱖自浮沉

明月照孤艇清風飄素襟物我俱兩忘悠然塵外心

贈道者張回風時寓居雙林寺

回風西北來入我雙樹林松聲常在耳彷彿絲桐音
靜時若有得動處元無心炎天訪禪宇為我開煩襟

寄陳伯玉徵士自號雲樵

桃李耀芳園芝蘭翳深谷世人競紛華君子秉貞獨
緬思雲樵翁中心澹無欲懇切辭簪纓還山養麋鹿

其二

養鹿春艸肥樵雲碧山深投閑固所願沽名本無心

清澗可濯足微風亦飄襟蕭然坐盤石長歌有餘音

其三

君歌我還續聲入雲霄間能使潛蛟舞亦招飛鶴還
依稀在仙島恍惚非人寰擾、當世士胡為多苦顏

白雲中人為陳知縣賦

青山何逶迤白雲時卷舒相看兩無心幽處真自如
斯人在巖壑承 詔升天衢回首瞻白雲浩然賦歸
歛朝與白雲對夕同白雲居縹緲落窻戶氤氳拂衣
裾雲中何所樂所樂在琴書常恐白雲散門外來微

車

題高山流水圖

泰山一何高江水亦以深寧知伯牙弦妙合鍾期心
清風邈千載大息誰知音斯人好古調拂軫徽黃金
一彈玄鶴舞再彈蒼龍吟脩然山水趣得之在胸襟
畫師亦好古能畫復能琴援筆寫幽意溪聲風滿林

題李次晦明復堂

寶鏡出匣中塵垢乃翳之一朝事拂拭鑑物分妍蚩
靈臺素澄湛利欲或昏迷誰知方寸間至理森在茲
先師有明訓于以覺後知性善苟能復聖賢可同歸

題鞠孟端悠然亭

淵明住柴桑門無車馬諠青山如故舊一見心悠然
若人慕高風作亭臨水邊高柳三五株蘭菊亦鮮
賓朋日過從飲酒和陶篇悠然得所樂庶以全其天

題陳寅賓暘谷齋

高齋面暘谷四序常如春挂巾扶桑枝晞髮迎朝暾
雍熙逢治世俯仰信乾坤未知羲和事自是堯舜民

題何氏南塘舊隱

陰森野竹寒繚繞南塘幽窓虛納翠靄門閑俯清流
中有隱淪士抱冲真寡儔垂綸聊自適守已澹無求
俯仰憶先世逍遙寓斯丘為歌少陵詩勉旃繼前修

題李氏維稼堂

逐末成澆風力本化淳俗遐思在古人播殖維嘉穀
斯堂俯青郊窓戶蔭高木了無塵事侵稍喜生意足
維時沛甘澤良苗藹新綠辛勤願有秋飽煖更無欲
唐虞致雍熙策許樂幽獨為子歌韓詩清風起盤谷

題樂閒堂

為善真可樂無營心自閑奈何世之人汨沒塵埃間
是中有佳趣游目皆青山依山構堂宇白雲鎖松關
古意閱圖史幽香聞蕙蘭尊前好風月泉響當鳴彈

題內弟吳大使子充墨龍

神龍潛九淵變化恍難測伊誰寫真形一覽壯魂魄
淋漓元氣濕慘愴風雨黑終當上天門四海望涓滴

贈相士黃逸仙

伯樂善相馬一顧增千金荀子頗知道相形先相心
黃生師唐舉於義尤精深取人或漁釣所遇多纓簪

嗟我守貧賤辱子過雲林未示衡氣機贈以離別吟

黎氏積慶堂詩并序

積慶堂者故處士黎君達山之所作也君質美而好義見善如不及且好施與里之貧窮患難者咸德之壯游燕都謁名公卿多進之以禮已而世殊事異乃歸老于滄洲之上有良田廣宅為子孫計而樂於為善前監察御史胡公行簡與君在燕都時為舊交暇日過之喜君歷世變而壽富康寧子若孫環侍左右衣冠禮樂蔚然有太平之風謂皆君之積善所致乃為顏其堂曰積慶且為之記以彰君之德洪武壬戌余始獲與君之子季敏游於滄洲之上時君去世已期年矣追思曩昔嘗識君於翠屏山中挹君之風采誠有願交之志而恨相見之晚也嗚呼君今不可作矣余既登君之堂又惡得無情哉謹賦五言八韻詩以述君之德併以勗其後之人使勿替引之則君其可謂不亡矣詩曰

積善有餘慶不善有餘殃至公在司造報効亦已彰

蔓草務去根猗蘭願留芳人心與天理好惡乃其常
駟車于門高五桂竇氏昌陰德信有徵福澤其無央
斯堂扁積慶著善斯不忘後人繼芳躅奕世垂休光

東同宗鄧仲偉

流水本同源叢蘭亦同根匪有薰蕕異而無涇渭分
余忝高密喬念君亦聞孫禮服既悠遠歲月復馳奔
相視如路人莫知卑與尊茲晨得良晤永託為弟昆
所重骨肉親貴賤安足論我昔歷艱苦慷慨心欲言
八齡失所怙有幸慈母存鞠育與教誨天地同深恩
乳離廢舊業詩禮猶清門不敢忝厥祖佩服先哲言
為君寫衷曲短筆聊復援

外甥吳緝字克熙洪武十二年二月客死于

景陵時年二十八余哭之慟賦此以志余哀
人生天壤間修短難一致吾甥昔四人今焉只存二
緝也頗聰明風骨亦殊異總角事詩書英年搃材藝
山林厭拘求湖海多意氣辭親遠服賈霜雪逼殘歲
昆弟爭挽留同侶復牽制別去一月餘還附手書至
悲風忽重來聞作景陵鬼景陵在何方西北數千里

黯々荆山雲茫茫，漢江水白骨埋黃沙。荒阡復誰祭，
吁嗟乎蒼天奪汝竟何意。惡艸常蔓延，幽蘭易凋悴。
我思平生情，悽愴裂肝肺。親老子尚孩，相看祇垂淚。
汝父客嶺南，歸骨已無計。汝復歿他鄉，不鑑覆轍弊。
作詩招汝魂，仍以戒後世。

送何正夫西遊

野老守貧賤，無營方灌畦。故人將遠適，問我審安危。
窮達固有命，行止亦有時。人能不違天，履險如平夷。
君既悟斯理，行矣復奚疑。

寄興平稅使何維翰

自古有離別，余今獨傷悲。関河數千里，輾轉勞夢思。
時序倏以遷，容鬢日以衰。蕭々翔風寒，杳々孤鳴飛。
欲往良獨艱，相見詎有期。商歌意無限，零泪忽霑衣。
高允憲先生客習氏館中清風修竹翛然有

塵外意喜而賦此

蕭々池上竹，颯々林間風。來為誰清乃，與君子同。
君子秉貞節，翛然在山中。歲寒不改操，結交梅與松。

客館歲暮別友人

齋居僅一畝，旅寓將五旬。盈几散書帙，並坐儼冠紳。
從容談妙道，彼此樂清貧。燈孤不成寐，歲晏喜相親。
寒氣正催雪，梅香偏襲人。情深忍離別，詩就寫慇懃。

夜坐有懷丁御史子堅

山齋夜岑寂，落木含淒風。青燈照孤影，幽思浩無窮。
人生無定居，飄轉如飛蓬。美人在何許，使我心忡忡。
援琴復置之，默坐想音容。

月夜有懷曾主簿伯曼

華月照虛館，悲蛩鳴草根。閑情還脉脉，離思更紛紛。
感慨不成寐，羈孤誰與論。惟應棄官客，佳思寄琴樽。

寄陳壺隱

十年不相見，遠客梁宋間。詞華動侯伯，羈思滿河關。
歸來厭世事，采藥遊名山。猿鶴共吟嘯，漁樵相往還。
有情泛佳菊，無語對叢蘭。即此羨閒適，營營徒險艱。

寄鄒椿齡

大隱在城市，小隱居山林。所居雖異地，所樂還同心。
我歌小山詞，君彈流水音。相知既已久，相憶思難任。
何時遂盍簪，綢繆話胸襟。

寄李如愚

黃葉林中深幽泉竹根冷徐步下逢人
雙飛見禽影偶傷良晤乖暫喜塵事屏
佇立遙相望微雲隔松嶺

寄曾隱君大雅其所居堂扁曰東樂

高山列屏障下有幽棲人崖壁饒古意
軒窗多白雲松陰覆几席蘭氣襲衣巾
其樂似東老熙熙滿懷春

北平檢校謝叔賓謫官嶺南詩以寄之

幽燕春苦寒嶺海冬尚熱寒暑君備嘗
相思最愁絕君懷自夷曠君心秉貞節
所願濟斯民艱難底須說

皇天幸無私白日照丹闕

寄畫者彭子惟求作松下煮蒲小景

高情似王維妙畫國無匹絕島與寒汀
揮禿干兔筆飄然江海蹤佇立懷高風
為作老松樹下着煮蒲公

江上有懷曾主簿

歸鴻不可留去鶴猶難招朔風起離思
短髮寒飄蕭遠樹帶斜日滄江生暮潮
雙飛愧鷗鳥獨立心搖搖

江上覽物有感

愁懷似江水汨汨無時休俯仰今古意
淒涼天地秋

鴻飛避矰繳魚躍驚綸鈎所幸遂天性逍遙在滄洲

讀陶淵明詩二首

吟詩不須苦吟苦失詩意吾笑郊島徒彫鏤損肝肺
凱風因時來微雨從東至憑几誦陶詩中有深味
我性愛陶詩難窺數仞墻閑來輒誦之愈覺滋味長
大羹無鹽梅土鼓諧宮商誰能起公死執鞭向柴桑

醉中作

平生不嗜酒至苦難避俛俛事勸酬聊樂賓主意
重觴即陶然兀坐時假寐君當恕醉人我已忘天地

讀道書作

籬落帶幽篁繁陰繫虛牖蕭然坐團蒲布衲蒙衰朽
平生好清虛道帙常在手意會欲忘言欣然復良久
有感

昨日天氣熱披襟步林間今朝翔風勁覺我衣裳單
氣運有盛衰天道常循環富貴何足羨貧賤何足歎

暮歸途中作

殘陽在林梢孤鳥度微影行人念歸程十里隔松嶺
蕭々風色寒漠々烟光暝稍喜近人家溪橋接村徑

客中逢鄉人得家中消息

去家不忍別，久客遂忘還。忽見故鄉人，與語增感顏。
比隣害疵癘，群從亦凋殘。所幸一室安，衛生良獨艱。
語終對斜日，一鳥鳴空山。意存恍惚際，心在悲喜間。

暮秋感事

寒風起蕭瑟，落葉鳴空階。榮枯固常理，時事何其乖。
俛仰慨今古，無由舒我懷。皇天亦愁思，白日常陰霾。

歲暮山中夜坐

冉冉歲將暮，沉沉夜初永。木落風生寒，窻虛月流影。

四鄰寂無諠，獨坐山齋靜。孤燈照殘書，妙道得深省。

元正後雪霽過隣曲

晴岫消凍雪，春郊布熙陽。嚶嚶幽鳥鳴，靜聽如調簧。
興懷訪故交，徐步登前岡。石竇通泉脉，林隈散梅香。
稍欣得勝地，復喜升華堂。交慶遇歲始，共語思時康。
願言課孫子，讀書力農桑。

午睡初醒景與意會援筆賦此

綠陰滿庭戶，苔色上階除。數聲幽禽語，一枕清夢餘。
起視日將午，隱几觀殘書。陶然若有得，心存太古初。

山行

山行不逢人，山鳥隨我飛。
松風起澗壑，草露濡裳衣。
獨立愛蕭爽，此心忘是非。
何由跨仙鶴，一往尋安期。

喜雨二首

甘澤被邱園，良苗似膏沐。
杖藜恣逍遙，滿眼生意足。
野飲携匏樽，農談過隣曲。
躬耕幸有年，何用于微祿。
簪纓世所榮，犁鋤我所安。
况兹蒙潤澤，豈復憂飢寒。
園中摘蔬果，案上羅杯盤。
諸孫戲我側，俯仰良可觀。
山妻顧子笑，自足平生歡。

喜雨寄諸友

仲夏風雨多，蕭々涼氣生。
憑軒望原野，品物皆敷榮。
唐虞在上位，海宇際升平。
豐年况有象，一飽更無營。
喜來賦新詩，持用寄高明。

雨後作

山中足時雨，蕭爽如清秋。
飛泉灑絕壁，白雲被高邱。
我性好冲澹，無心事彫鏤。
興來且斟酌，吟詠當歌謳。
洪武癸亥夏五渡江訪諸友，暮歸既登舟而

風雨驟至

清晨訪故舊及暮如言還發棹風雨至去留良獨難
小舟如一葉出沒波濤間兀坐喪神魄相顧慄不歡
此身盡沾濡那復惜衣冠在險猶倉卒歷險心始寒
從茲慎行止寧復嬰憂患

對庭樹

庭隅有佳樹偃蹇繁枝柯長夏蔽朱炎蕭々涼氣多
玄蟬噪其間好鳥聲相和余亦性所愛對之聊詠歌

青山有高人

青山有高人澹泊無所求雖能抱材藝不肯干王侯
龍劍藏寶匣霞衣住丹邱浩然足清興何必三神遊

晚涼訪隣曲諸友

晚涼步幽徑微風飄衣襟悠悠何所思所思在同心
鄰居二三友託好在雲林寧憂貧與賤所樂書與琴
閒時輒相過有酒能共斟醉時各分散明日重相尋

夏日有懷丁御史

永晝倦煩燠披襟倚南窓浮雲忽凝陰鮮颺喜微涼
心境適澄靜脩然塵慮忘故人應此際高卧到羲皇

送鄧吾貫往山東省親

天地司化育品彙咸昭蘇懷哉父母思實與天地俱
生兒待終養服勞報勤劬兒幼父行役傷心復何如
憶昔初別時痛哭牽衣裾關河數千里風沙各天隅
堯舜在上位山河歸版圖雲屯齊魯邦四境今無虞
覲省戒行李艱難涉長途是時朔風致野樹寒蕭疎
出門指天日見父乃旋車送者為之感聞者為之吁
純孝敦古道性善由厥初茲行畢素願勗哉慎其軀

早春踏雪遊群玉山中

山中春早寒澗道積氷雪屐齒碎瓊瑤行吟思清絕
仙人乘素鸞飛下白銀闕授以長生方金莖和玉屑

贈星數陳鶴臯

天運固有常命理亦以微先聖既罕言後學鮮能知
巫咸實詭秘虛中頗神奇衰旺酌五行禍福剖衆疑
寥々千載下術者誰繼之斯人襲世業造化窺璿璣
勗哉師古人庶以鳴當時

遊金坡道院

曾閱金坡圖未訪金坡山茲晨覽勝跡恍若非人間
杳靄數峯合蹁躑孤鶴還壇高聳石壁雲白鎮松關

感慨劫灰後遨遊西日殘長吟下山去塵土復愁顏

謝李文煥贈圖書

圖書重斯文攷法從異代大巧人競為古拙吾所愛
人生如駒隙俯仰增慨感君勒姓名或可傳千載

此老

此老日無事悠然天地間臨池羨游鯉倚檻愛青山
心與白雲遠意同芳樹閑從渠逐聲利貧樂獨希顏

余性資庸下學術空疎白首無成私竊自慨
然先儒有言自天子以至於庶人未有不須

友以成者乃作取友詩一章

友道非細故乃在人倫中取友以輔仁庶幾反淳風
損友不可親益友宜與同匪資共咲語實賴相磨礱
取友不失人德義日以充所以君子心此道尤敦崇
一日不獲見使我憂忡忡謹心但朝暮桂性宜春冬
陳雷與管鮑令譽垂無窮爰作取友詩予以告羣公

送鞠孟端赴京

大明麗中天仁風被寰宇子抱經濟才峩冠謁明主
從容陳典謨慷慨論今古欽哉輔唐虞雍熙幸重覩

寒夜自釋

掩卷坐良久自傷還自釋時命偶未遭詩書其可惜
囊中有焦桐取之還拂拭應有知音人一彈三嘆息

客夜

窻虛映華月砌冷鳴寒蛩悄悄客懷薄沉沉冬夜長
經時去茅屋百念生蒲床年華等流水髮髮明秋霜
何如守玄默歸卧南山陽

感興

烏兔迭循環山川自流時悠悠宇宙內人生獨能幾
榮華如飄風世事若流水安得求長生後天與終始

故上海令黃子律哀詩

子律名鍾吉之永豐人也業儒尤工於詩
有盛唐之風焉洪武癸亥春以賢良徵至
京師授上海令上海地廣賦多民囂於訟
稱為難治君至平弊政施恩威民皆悅之
既而以罪去官執法者令服徒役未幾遇
赦免君望闕謝買舟南歸因中暑暴病歿
于清江之境其友人具棺衾權殯于新淦

之柅洲君與余同歲而生余少長數月每
切磋琢磨講明雅道有益於余者多矣於
其卒也寧不為之輿傷也哉乃作詩以述
君之行亦以志余之哀也

葛溪有矐儒冰雪瑩懷抱世事澹無營經史日稽考
蹇余素相知同年復同道誼重比金蘭才高擅詞藻
前年赴公車異縣得國寶廉勤恒自守始終竟莫保
賜歸荷皇恩抱病因熱惱望鄉無百里淪沒殯江島
嗚呼哲人萎寂寞青山老痛哭悲風來愁雲翳穹昊

雨後寄何幼恭

積雨生夏涼微雲凝午陰逍遙庭樹下拂拭朱絲琴
流水滌煩慮好風飄素襟誰能同此樂惟有故人心

喜雨示諸生

乾坤開泰運時和致年豐仲夏甘雨足黍苗既芄
清晨出東郊談笑值田翁辛勤乃有獲鹵莽難希功
感此還自歎耕學理則同從茲共勉勵無使愧良農

自歎一首示贊貫二子

少壯頗踈懶老至精神疲雖耽古人書晝誦夕已遺

拊髀常自歎人生果何為良田不耘耔年登恒苦飢
為學不勉勵歲月空自馳悔悟雖已晚踐履斯其時
作詩示汝曹盛年當勉之

秋日憶婁仲實

秋風吹庭樹黃葉紛々落時序有更遷愁懷自蕭索
俛思年少時携手共行樂容鬢今不同交情宛如昨

秋日憶何同德

結交三十載回首如一朝往事君莫論別恨終難消
秋風感衰鬢皓月懷清標吾道其已夫斯人甘寂寥

讀淵明詩

霜風透窓隙皓月流清輝良夜誰與同孤燈對陶詩
新意有得舊題頗知非從茲循軌轍庶免惑多岐
冬夜懷曾君季孫何君有大

良夜霜氣肅繁星麗高天微風響殘葉徙倚臨前軒
時物有榮粹容華非昔年人生會能幾憶別心煩悵
北平檢校謝叔賓左遷廣東仁化縣幕職復
以朝賀後期謫雲南安置余於外賓為姻友
昔別各淚下霑衣今相去萬里而三載下面

烏得無

清哉

別淚不可忍相思心愈傷雲南瘴癘地十月無水霜
天運有往復聖情思否臧終看沐休澤僂俛安其常

題嚴氏釣隱

尚父遇西伯子陵辭漢光胡為異出處所貴安其常
斯人樂漁釣榮辱俱兩忘桐廬在何許烟水自微茫
我性愛樵牧無心慕軒裳為君發吟詠有興在滄浪

題鄒氏養浩堂

二氣生天地運行無息時惟人在所養失養斯餒而
此以君子心操守罔或違克然集眾義勇往將奚疑
君家本儒素養浩畫堂楮旨哉孟軻言允為百世師

寄艾錄事潛虛

南州有一士養浩歸園田與世素寡諧尚友千載賢
濁醪泛佳鞠細和淵明篇而我慕斯人離別今有年
雲山渺無際安得同周旋

寄王知縣彥翬

辭榮抱幽獨足以全其真舉瓢酌山月掃石眠松雲
吟詠謫仙侶栖遲巢父隣何當訪猿鶴從此遠塵氛

江上有懷張粹恭

清川日悠々遠樹何蒼々羣鴈向北飛孤鶴獨南翔
美人樂棲遯采薇陟高岡相思不可見烟霧正微茫
雨中寄張文凱

川原春夏交淫雨無休時閑門掩芳草隣曲往還稀
遠樹帶雲靄山鳩猶暮啼懷君當此際欲往畏途泥
聞徐縣丞伯登館中病起

大江何瀰漫咫尺若干里注目广山雲懷君病初起
眷言託交情金石良可比離別慨經晴楊花逐流水

悼亡

衰年失內助撫事懷百憂傷我兒女情哭泣無時休
感 裂中腸涕泗忽交流悲風既慘々白日空悠悠
容顏不復見思義莫能酌恨無神仙訣千歲同優游

二

憂思不能忘鬱結何由開一杯強排遣頃刻還復來
落花隨春風片片拂簾幙不見閨中人韶華成寂寞

出還

將歸懷百感及門愈悲酸入室見虛位痛哭惟憑棺

總惟起悲風白日淒以寒九泉不可作長夜何漫漫
月缺有時滿壁毀終難完莊生自曠達我獨摧心肝
余客滄洲之上對月有懷路川何先生伯善
寄此用代手簡云

我々華蓋山下有隱者流餐松養性靈築室事藏修
豈曰薄軒冕世異還歸休閉門恒著述拄杖或夷猶
宇宙慨千古烟霞娛一邱相思對明月霸思滿滄洲

聖主得賢良詩

高天羅萬象巨海納衆流盛世逢休明俊彥皆羅搜
虞舜舉元凱湯武用伊周典謨訓萬代仁化洽九州
吾皇法古聖令德日以修求賢不暇食日為蒼生憂
杞梓入廊廟樗櫟在林邱作詩繼雅頌亦足替皇猷

江上有懷石門梁先生

微陽落平沙高樹帶殘雨客思墮微茫漁舟泛容與
蕭然來遠風獨立誰與語悵望西飛雲相思渺何許

題孫氏巖雪齋

天生小崆峒屹立大古初玄冬積皓雪瓊樹高扶疎
爾性愛清潔對之還結廬誰憐苦寒夜相映讀群書

題吳大使文昌觀海圖

波光涵大虛，樹色帶青靄。宇宙一何悠，山川長不改。
逍遙陟層臺，俯仰成千載。欲與沙鷗盟，扁舟亦浮海。

題吳南任棲雲樓

朝訪棲雲人，暮登棲雲樓。山深雲氣合，樹夾翠先浮。
溟滓若太古，逍遙及涼秋。心游宇宙內，契合神仙流。

四皓對奕圖

山中茹紫芝，石上奕殘棋。勝負本無意，行藏斯有時。
高風惟見畫，白髮總成絲。拊卷懷千古，微公漢祚危。

友人陳仁輔好古之士也效古體以贈之

古人不可親，古道不可離。古貌人所見，古心誰得知。
陳君頗好古，要我題古詩。古讀風雅道，古仰庖羲。
懷古在鴻荒，感古長歎歎。

學山詩為徐縣丞伯澄作

祖晚山父如山
故自號學山

天行本無停一息，可萬里人學法乎天乾。詎能已
譬如欲為山，初焉覆一簣。豈暇計歲功，未成安可止。
一朝成高山，萬古蓄元氣。雲霧含氤氳，松柏藹蒼翠。
廟堂需棟梁，風雨資大庇。未成一簣者，視此寧不愧。

偉哉學山翁善學足繼志罔俾眉山人專美假山記
友人張季倫喜予五言古體蒙見和賦此為

謝

東坡慕淵明往々和其詩願我復何人謬蒙君子推
林園無異歡吟詠每忘疲感君屢賡歌恍若奏金徽
魏晉世已遠高風今見之七襄不成報臨風渺予思

題黃伯原友鶴軒

人倫重五教物類稱四靈奇哉九臯鶴亦復載諸經
性潔無與比君子化其形巢雲松柏高警露風月清
是以貞素士取友非虛名紛紛重勢利幽獨鮮交情
豈不愧鳴鳥時聞求友聲

題敖膳部歸田卷

聖代徵賢良山林有遺逸斯人抱奇才歟起輔王室
鼎鼐事調和禮樂正得失從容近清光明哲保終吉
賜歸憫耆年養道得閑日田園未荒蕪林木正森鬱
蘭香襲衣裾竹色映書帙支頤靜看雲發興或搦筆
貞素為已有榮辱視外物余生亦棲遯嘯傲烟霞窟
安得從教仙燒丹蛻凡骨

秋日覽物有感寄丁御史子堅

鴛鴦有定偶鴻燕無同時覽物遽興感懷人復生悲
情深託綢繆道遠成睽離疑義誰與析良晤終難期
我、葛峰高瀾、清江肥何當共釣游永與塵事違

題金好仁樂志堂

城市與山林誼癖本不同澄心即淨域豈必在山中
斯人守一廛澹泊猶古風圖書列左右日月從西東
俯仰無愧怍行藏任窮通悠然觀萬化其樂那有終

題謝彥剛養浩堂

培根枝葉榮養氣身體充體充本無物道義存乎中
孟軻真亞聖立教誠有功一登養浩堂俛仰懷高風

題錨氏圭峰樓

層樓面圭峰、色自蒼翠隱几聞松聲開軒納雲氣
神清餐沆瀣境靜隔氛翳對此彈絲桐中含太古意

題吳克承雍穆堂

喬林蔭豐溪中田構華屋靡、庭下蘭猗、檻前竹
端居習儀禮少長咸雍穆春醪介眉壽動止膺百福
允矣斯道存庶幾敦薄俗

題符氏靜軒

陰陽本無形配合乾與坤陽動司發育陰靜乃歸根
冥心觀造化至理諒斯存何當掃閑軒日與靜者論
題高子完具慶堂

斯人薄世榮所厚在倫誼構堂奉雙親綵衣日娛侍
崔嵬靈椿古豐茂諼草翠培養全其天南陔庶無愧

登羣玉峰

羣玉有佳處登臨諧宿心千巖互隱見萬木含陰森
極目小天地曠懷無古今臨風一長嘯孤鶴下遙岑

晚興

西嶺下紅日前林生白烟憑軒散游目歸翼何翩
彼初自閑適此身胡不然冥棲在岩谷養道希長年
中秋夜客中思親

明月今夕圓良朋一時集四坐各驩虞中懷獨憂悵
所憂浩無端所慕嗟何及清歌那忍聞背面成悲泣
雨後訪江上親友

今日天微和駕言適江口春風如有情拂我沙頭柳
上有黃鶯鳴関々苦求友感此懷故人交深別離久

相逢且論心豈在接杯酒古道良可敦浮名復何有

雲谷為玉笥道人賦

幽意在雲谷高風懷考亭東西雖異地復此託嘉名
香靄翠峯合氤氳佳氣生窓虛白日晚衣潤暑天清
坐石對仙客焚香觀道經松花宜酒味泉響當琴聲
窈窕絕塵鞅逍遙違世情何當託栖遯服食致遐齡

偶題

平生寡嗜欲所好在吟詩朝夕吟不已鬢邊已成絲
幼女頗解事長跪成戒辭吟止適情性勿使精神疲
深感吾女言而我樂在茲一日不吟詠滿懷動憂思
阿女顧予哂予心還自怡春風入庭院花陰滿前墀
清興不可遏把筆更須題

春愁曲

昨莫思出遊今朝還復止瀟瀟風雨聲摠在春愁裏
落花沾污泥片片飛不起何事與閑愁共付東流水

暮春閑居

冉冉春已莫瀟瀟風雨交殘紅付流水新綠蔭衡茅
玄鳥識時序雙雙尋故巢靜中方遣慮憑几玩羲文

春日寄丁御史子堅王知縣彥暉

光風拂柔條膏澤被幽草翟雉羽毛鮮倉庚語音好
彼物各生成吾年獨衰老感此惜韶華觴來即傾倒
栖遲託邱園窮達付穹昊却憶同心人貞堅永相保

仲夏

仲夏足時雨良苗被東臯辛勤畢農務餘暇且遊遨
携杖歷阡陌涼風吹鬢毛公劉世已遠守拙謾希陶

讀淵明詩

古詩出性情氣運閔盛衰聖人既刪述可以弦歌之
後來移習俗綺麗誇當時淵明本清真冲澹乃其宜
我性頗淳朴平生愛其詩駑駘事鞭策安得同驅馳

丙寅歲饑且旱禱而遂雨

驕陽欲肆早我心日憂煎攄衷訴真宰甘雨倏沛然
况復連日陰潤澤斯能全晨登隴畝間眺望涼風前
嘉穀總生意衆草亦鮮妍始知天地心長育無枯偏
我生食破硯亦有東臯田年飢幸豐稔喜極著斯篇

余居金川玉笥之間以漁樵耕牧為樂賦

詩四首

落日照廣川，
娟娟垂釣絲。
遠風忽徐來，
飄飄吹我衣。
彼物恒自得，
此心澹忘機。
渭川不可想，
玄真乃吾師。
白雲滿青山，
深雲自閒朝。
躡蘿逕伐木，
向雲間鳴鳥出。
幽谷流泉響，
潺湲負薪行。
且歌世事無相關，
鬱鬱墻下桑。芄隴上苗開，
春理農務生計願。
豐饒時雨夜來過，
滿田嘉穰抽欣然。
願兒女一飽復何求，
耕田藉牛力，
牧養須及時。
驅之入郊原，
泉甘春艸肥。
扣角聊復歌，
日莫徐歸從渠笑。
貧賤頗勝蹈危機。

明月中天月

明月中天月，
良夜流清輝。
自從開闢來，
不知幾盈虧。
人事有代謝，
天地無窮時。
安得求長生，
對月常吟詩。

飲酒

淵明好飲酒，
重觴即忘天。
李白性所同，
自稱酒中仙。
我素不解飲，
少亦陶然酒。
能助詩興一斗成，
百篇我飲僅數杯。
我吟亦數聯，
誰知醉吟中。
其樂不可言。

月夜述懷

貧賤非可樂，
所樂安其常。
紛名利塗，
而我業田桑。
朝出自荷鋤，
暮歸還舉觴。
微山風來皎，
明月光。

幼女勸加餐諸孫牽我裳相顧聊一哂萬慮俱消忘
洪武丙寅有妖僧誘愚民為亂不旋踵而敗
有感而作

乾坤蓄四德品彙資生成彼物固蠢然人心本虛靈
柰何庸愚者往々輕其生大義廢綱常春秋重典刑
中心懷惻隱作詩垂戒懲

釋疑

杞人憂天傾晝夜忘寢食吾嘗笑其愚今為衆所惑
賴有聖賢書潛心豈無得至理不可誣渙然若冰釋

題陳伯霖竹深處

何處還清幽乃在深竹間天風動琅玕鳴珮聲珊珊
翠合帶烟色陰森生夏寒逕微通窈窕意適任盤桓
厲搯歷冰雪安巢栖鳳鸞客來須徑造蓬戶不曾闕

與故人論詩

故人賞我吟搯紙索我題展席臨清風頗覺心神怡
幽禽何方來和鳴在高枝文魚亦游泳新水初盈池
對此發清興援琴賦新詩鄭衛非所好鮑謝難同時
古人如可作淵明真我師

述先訓

先親有遺訓家本積慶門富貴非所慕以安遺子孫
堆床積編簡繞宅置田園世々力耕學餘事安足論
苟能慎所守我死如生存總角佩先訓自勵窮朝曛
行々向耳順白髮日以繁恒恐墜先志作詩貽後昆

菊逸為張與謙賦

淵明避世俗種菊繞東籬高風邈難逮幽趣鮮能知
時有慕陶者愛菊亦如之飲水可延年餐英可充饑
培植千萬株雨露日以滋草木遂天性人豈殊於斯
優游樂肥遯氣充神且怡彼我逐聲利於道乃相違
何如委窮達閑飲誦陶詩

次錨俊欽見寄韻

微風度雙鳥落日鳴孤蟬悄悄動離思悠悠傷莫年
因思同心友載誦停雲篇俯仰天地內夷猶江水邊
漁舟間白日旅舍隔蒼烟踰月不相見來思詩娛目前

擷蘭生詩為陳長文賦

吾觀天地化草木亦已蕃光風汎九畹膏澤被崇蘭
美人擬為佩采々幽岫間何當遺所思報以青琅玕

客歸遣興

旅館厭逢迎還家少來往山風時自生浙瀝有清響
無言玩義文陰陽識消長動靜各有機澄心得所養

病中

平生厭拘束所好在遨遊淹旬抱寒疾閉戶擁衾裯
地爐燒楮拙滿室青煙浮開軒畏風色面壁心煩焦
鄰曲相慰問磬效弗能酌良醫不易致藥物忌所投
至人善調攝失養將何尤從茲保元氣天地同周流

寄李伯韶兼呈梁徵君

乾坤蓄清氣日月垂休光聖明既有道文運亦以昌
羣才生斯時李君乃其良雄文煥星斗令德猶圭璋
我思見其人道路阻且長翩翩雙黃鵠舉翮各蜚翔
為吾謝梁公夢寐心不忘

題何幼恭所藏方壺洪崖畧

洪崖蓄元氣蒼然太古色乾坤一砥柱巨靈豈能擘
衆山非不高蒙翳多荆棘茲崖獨荒涼乃有古仙蹟
偉哉方壺仙善畫人莫識揮毫奪神功白晝天昏黑

題婁仲實繼志齋

先人誨後人後人繼先志所遺非贏金一經乃傳世
蕭然坐幽齋、外列叢桂靜觀河洛圖造化有深意

哀詩錄寄富溪朱孝子且以自哀吾母云

吾母久已沒汝母亦不存哀哉不有母何由生我身
幼小俱失怙喪亂家益貧衣食仰慈母教育乃成人
母沒身獨在再見嗟無因慈烏未返哺哀鳴夜達晨
呼天杳不聞痛恨何由伸母德實深厚至哉比坤元
報答恐無地揚立當顯親曾參有明訓與子書諸紳

題王自閒守拙齋

自閒四子命名曰可
漁可樵可耕可牧

堪輿何茫茫萬彙生其中鴻荒世已遠淳元變澆風
智巧日以滋古道誰能崇猗欵谷中叟讀書且明農
衣不尚紈綺門惟掩蒿蓬漁樵與耕牧四子各已供
此心常自閒衆欲鮮能攻從人笑懶拙巧者勞其躬
覺衰自遣

生世誰不老既老何必悲但恨減情思未成千首詩
前瞻愧蘇李後企師陶韋吐辭無詮次醉裏聊書之
君聽樵人笛信口雲中吹

幽居

山中有流水隴上多白雲二物本無盡幽居誰謂貧
朝耕在雲裏夕釣臨水濱此外復何樂讀書師古人

蓮

幽花何亭亭性潔出漣漪其香遠逾清褻翫非所宜
物有君子操人豈不如之彼哉譽昌宗我獨思濂溪

豐年

幽風世已遠王業今復隆豈敢辭艱難治本當力農
維時降甘雨我稼已先一稔定可期未私乃先公
公家畢租稅祭祀亦已共飲酒日為樂不知年歲終

戊辰歲夏五月嘉穀初華而北風不止民以
為憂恐秀而不實予乃默禱於天越翼日及
南風足以阜財解愠有喜而作

仲夏多北風拂我庭樹枝樹枝不足惜嘉穀乃非宜
默禱若有應今朝反南颺憑高一眺望品物生光輝
天道妙斡旋聖心乃弗違至公在刑賞足以安群黎

題臨川黃九鼎北山清隱

周顒去北山乃取當時譏君為北山隱豈蹈昔人非
地異名偶同居偏心自怡白雲滿窓戶清風拂裳衣

近招華蓋仙遠憶商山芝竹松可屬搥琴鶴鎮相隨
於此樂清澹浮榮非所知

鄧伯言玉筍集卷之一

鄧伯言玉筍集卷之一

國家圖書館, NATIONAL CENTRAL LIBRARY, TAIWAN, R.O.C.



鄧伯言玉筍集卷之二

歌行

送范知縣美解赴京分題得九仙臺

玉山根盤數百里上有高臺半空起地闢天開玉削
成今來古往神居止亭々萬仞撐晴空旭日照耀金
芙蓉層崖疊嶂鎮晴霧紫蘿碧草搖春風九仙々去
一千載不在緱山定瀛海月明環珮每歸來臺上遺
蹤慨古今指點群峯三十六石崖飛瀑能清心蒼涼
落日歸林鶴臺上霞光爛相爍



脩然遊罷去朝天何日燒丹尋舊約

題陶用大淵明歸去來辭圖

虹縣入鎮襄陽

授武節將軍

田園荒蕪亦已久彭澤何須求五斗徘徊三逕撫孤
松悵望閒雲數歸鳥聞孫為國勵精忠出處雖殊氣
味同却憶柴桑遊未得祇看圖画仰高風

題謝知縣東山讀書圖

幽人示我東山圖耳邊如聞猿鶴呼雲生寒巖翠縹
緲樹夾流水青扶疎中有山房絕瀟洒苔蘚侵階藤

覆瓦角巾隱几是何人謝氏賢良讀書者

題丁御史五老履端圖

正月二日天氣和東風忽爾來相過汀洲草堂集五
老春酒介壽歡如何吁嗟行藏信所遇白頭猶向山
中住不是當年遇綉衣画圖那得留清譽

題李如愚環山亭

太行之陽有盤谷玉筍十里來環山々人高風繼李
愿作亭正在山之間兩山盤迴宅幽阻一澗泓澄石
可數居人比屋樂漁樵令族前朝列珪組當今天子

開治平胡為不出留斯亭、中佳景自可樂秋桂弄
影春蘭馨長松亭、間修竹上有鷓鴣下麋鹿興來
掃石坐清風自拂瑤琴彈一曲酒一壺醉後擊節歌
鳴、不須更問于鍾祿此樂人間還有無

題胡伯輝問月軒

天風浩蕩浮雲開人間颯爽無炎埃捲簾呼酒待明
月玉盤飛上東山來須臾大地俱皎潔疑是千山萬
山雪何處飛仙跨鶴來一聲錢笛蒼崖裂君家本是
故侯家問月何須起嘆嗟試躡雲梯天上去廣寒丹

桂正開花

題李如愚太白把酒問月圖

把酒問明月今古悠、幾圓缺月輪雖缺有時圓人
似浮漚還易滅團、桂樹搖天風瓊樓劇飲歌吹濛
舉杯邀月、在手何用捉月波濤中我願生年一千
歲與子同醒復同醉不須步月向蟾宮尋玉峯頭共
游戲

和錙俊欽將進酒

蒲萄酒鸚鵡杯舉杯縱賞茶縻開翠裾紅袖緩歌舞

戲蝶游蜂紛往來人生及時且為樂莫待花殘春寂
寞賓朋滿座酒滿缸花前袖惹春風香少年此樂殊
未央祇恐兩鬢成秋霜願招松喬與對飲乞取海上
長生方

和錨俊欽華表鶴

遼東城上風淒淒華表柱頭秋月輝千年白鶴作人
語至今聞者為傷悲傷悲復傷悲今古悠々無盡時
何當服食生羽翼還從海上尋安期

題羅宗瑞法師禱雨感應卷

南州大旱禾黍枯赤日照地如紅爐老龍卧穩鞭不
動無乃上帝封江湖道人早歲曾學道能以精誠事
祈禱綠章奏罷起風雷三日為霖救枯槁吁嗟妙道
不可言安得共究玄中玄君不聞武當昔有張洞淵
道成擲筆還升天洞淵成道之日作頌曰行年八十
一幻緣今已出擲筆歸去來大虛
跡無蹤

銅雀硯為謝檢校叔賓賦

鄴中廢瓦荆榛裏幾對鴛鴦飛不起千年雨露飽涵
濡蘊蓄元精呵出水君家瓦硯古更奇龍尾鳳尾真

堪齊昔年益覆貯歌舞此日研磨助發揮嗚呼粉黛
成塵土惟有文章照千古摩挲此硯為題詩漢魏興
亡俱可悲

未央瓦硯為徐縣丞伯澄賦

未央廢後成荒草片瓦拾來如拾寶溝池磨洗却灰
餘作硯寧輸銅雀好方平潤澤如錢堅窻間試墨生
雲煙大明功業可紀述西漢文章宜校編吾知徐君
實好古却憶鬱侯心獨苦嗚呼漢家宮闕四百年此
瓦作硯人猶憐

豹枕為羅孟載賦

古今才名孰可數人言羅鄴詩中虎異哉石枕虎豹
形枕虎哦詩魂不驚珊瑚琥珀未為寶此物辟邪久
見好向來借我枕向雲松巢黃斑逐隊聲咆哮

送醫士李文中歸永豐

葛仙去幾百年尚留丹井陽山前丹氣夜燭東南
天不知妙道何人傳李君好仙仍好學到處題詩魚
賣藥只今歸隱白雲深服食金丹養黃鶴

競渡歌

石榴花開燕新乳蒲風拂面收殘雨江頭競渡鼓轟
雷千載遺風續荆楚嗟哉三閭賢大夫汨羅自溺胡
為乎懷王信諛薄忠義清溝豈肯同汚渠寧甘一死
葬魚腹萬古湘潭深且綠至今競渡起歌聲聽者如
歌還似哭誼呼兩岸聲沸天不知勝負誰家船錦標
奪得唱邪許盡說兒郎年勝年

清夜對月

萬古一輪月清光照九州長生白兔搗靈藥不能醫
此萬斛之窮愁人生百年世稀有去歲紅顏今白首
憑誰喚起謫仙人乘月高歌對樽酒對樽酒發長嘆
月中桂樹不可攀功名富貴我何有詩卷長留天地
間

中秋陪諸公燕集

去年曾赴滄洲期中秋對月哦新詩今年此夕月仍
好却恨去年人易老美人置酒開我愁酒酣起舞仍
歌謳歌聲激烈振林木桂香冉冉風蕭蕭月中白兔
搗靈藥月殿霓裳奏仙樂人間天上際佳期笑把金
杯恣謹謹恣謹謹情悠悠古往今來春復秋中天明

月願長滿四海諸公常共遊

讀姚子深寄婁良器詩因述古作者之意次

韻

淵明家住潯陽口籬下黃花門外柳素琴挂壁本無
絃祿米何心求五斗五言家法信有傳日對青山題
數聯平生所樂在杯酒百疋春風耕秫田坡翁學陶
得三尺古澹中含溫潤色昔年遷謫到羅浮一日詩
名播南國陶蘇已矣遺高風皎若寒蟾行大空當時
二老自曠達胸襟浩蕩春波融後來虞范金閨客海
內文章乃為伯崑崙大華西相高鷹隼飄飄勢無敵
彼猶干鍾我一觚奴僕命我從奔呼作詩固是性所
好陶蘇虞范難為徒姚君英才最超越思入高唐更
飄忽烏絲闌上寫春雲白玉杯中吸秋月別來去日
急如飛澤鴈隨陽梁燕歸人生乖隔每如此寧不拊
髀長歎歎七山南去二十里不識興居近何似因賡
妙句論古人更寫幽懷寄雙鯉

久旱用廖南溟韻

我有雙劍恨不斬虹蜺虹蜺日天東橫隔斷山東

雨暗山西晴良田六月塵埃生官家租稅乏供給胥
吏打門朝莫聲安得封書奏明主下詔即免今年徵
君不聞府帖昨夜來點兵漢官政化今及更令民賣
牛買劍東南征傷我大旱政如此何不蠲租罷戰紆
民情為邦乃以民為本固未必邦家傾嗚呼本固
未必邦家傾安民不戰四海平

芙蓉花邊燕客歌

朝見芙蓉開莫見芙蓉老韶光似箭不少留鏡裏朱
顏豈長好主人留客多歡情玉壺置酒花前傾群公
掉頭不肯飲何如莫向花邊行尊中有酒能盡醉花
亦向人取歡意酒闌斫劍歌莫哀明年花發應重來

奉簡羅淵泉

字民覽吉水人
澗谷先生從孫

豫章先生八十餘有才不仕山林居黃塵黑霧暗滄
海白髮青燈看古書古書喪亂今餘幾六籍瀾翻口
能記喜尋玉筍雲松巢懶謁金臺朱紫貴帳前弟子
列兩行弦歌事業相頡頏先生冠帶坐終日嬉笑怒
罵皆文章有時吟詠長松下珠玉聯篇妙無價蘭荅
翡翠徒紛紜詞高義正關風化蹇余廢學今有年喜

來侍坐春風前沛然議論何所似倒挽銀河傾九天
梁顥科名今已矣方干雲卧終能比老懷浩蕩誰得
知我作長歌、未已玉山高、春雨蘿淦江袞、明
月波水流不盡山不老從此無如才思何

松壑為張仲倫賦

淦水東南望松壑秀色籠葱氣磅礴千株雪壓龍虎
爭萬竅風生筭籟作團、白石春泉香中有一士身
昂歲問之不笑亦不語羊裘草履漁竿長松間貯酒
三百斛醉采松花看麋鹿雨裏桑麻十畝園烟中蘿
薜三間屋浩歎風塵今幾春漁樵為伴松為隣明年
我亦從棲息松下憑君作主人

過彭蠡湖

天風送我揚州還挂席長歌彭蠡間鯨魚飛出白浪
起恍惚搖動匡廬山匡廬九疊雲霄上平湖直與爭
雄壯夜月龍吟百丈淵秋風鴈落黃蘆港天開地闢
元氣通萬頃鏡面涵冲融東船西舫棹歌發北客南
人萍水逢參差萬箇湖邊柳中有人家賣魚酒舟子
乘風不肯留船頭兀坐空回首船頭回首心愴然人

生幾得泛胡船却思大禹勤疏鑿功業留傳億萬年

王節婦詩

王氏之子年及笄嫁作進士梁君妻梧桐月冷鳳皇
宿芙蓉露白鴛鴦飛當時舉按期偕老豈意塵風不
相保投井寧甘死少年辱身那肯從羣盜高風凜々
冰雪寒激烈壯士摧心肝君不見竇家兩女墜崖谷
至今聞者為辛酸

鄧君伯謙南昌士族也挾筆墨來遊金川謁
諸文士余觀其氣宇不凡而有志於學告別

歸省詩以贈之

鄧君南昌人來作金川客白面紅顏弱冠時瑤林瓊
樹同標格曠懷喜結江海交掉頭不肯居衡茅五湖
吟嘯弄明月胡為訪我雲松巢囊中出彩毫匣中取
玄玉把卷臨清流索我賦別曲愛君情似江水長留
君不住空彷徨狂風萬里送歸鴈落木蕭々鳴夕陽
知君辭親亦已久雲白西山幾回首明年有約到南
昌錢柱觀前共沽酒

題高崇節地理卷

高君行年六十餘壯心猶似千里駒平生蹤跡半天
下手持九卷青囊書青囊之書世徒有妙理何人熟
參究高君讀誦口瀾翻要繼景純千載後君不見黃
河萬里天上来崑崙大華俱崔嵬乾坤定位聖人出
金陵王氣何佳哉請君直上金陵去徑叩天閔與天
語龍蟠萬古帝王州四海蒼生望霖雨

恒德堂為鄒母廖氏賦

二子伯瑜仲瑋俱有孝行

小年曾讀共姜自誓篇使我敬之神凜然只今廖氏
有恒德姓名千載同流傳廖氏本是良家子二十髮
居忍同死翁姑白髮子方孩自采蘋繁供祭祀白日
皎、天蒼、此心百鍊堅如鋼當年自誓靡他適堂
前終養仍終喪容顏漸老子成立更築高堂面青壁
歲寒何物耐風霜翠柏崔嵬二千尺

館市巡檢銜時中攝新淦縣事有政聲於其
還鎮詩以美之

將軍英妙年神采照白玉紫禁曾依日月光青雲蚤
展驂馱足翠屏西下淦水東驛路追、當要衝我
皇開國慎防禦子復領鎮持刀弓到官從容僅一載

鼓角樓新民俗改夜月山中虎豹藏春風陌上桑麻
藹居民外戶夜不扃行旅往來能送迎三鄉父老服
政令五歲兒童知姓名前年金川乏牧守黠行悍卒
喧騰久城裏居民日夜愁妻子難全况雞狗將軍政
績大府聞領符攝職仍施恩首同主將嚴法律商賈
坐肆軍轅門偉哉將軍人莫比文武才兼心似水政
成弊草強梗摧錢鞭躍馬城南回攀轅卧轍留不得
夾道松風起寒色翠屏萬仞高巔岼上有百尺青琅
玕歸囊得詩凡幾首把詩坐對屏山看

題丁子堅所藏張彥道畫唐官進馬圖

時二公皆

御史
歸田

張君上疏歸來早畫筆猶為當世寶向來得意寫龍
媒雲霧晦冥雷電掃青絲絡轡御者誰却憶唐官初
進時萬里來從沙漠道九衢翻動雪霜蹄當時天子
惜良馬亦命韓生作圖畫只今閑却兩青駘春草春
風在原野

題楊妃出浴圖

春光淡、春風起百轉黃鸝宮樹裏宮中妃子繡羅

衣晴來出浴溫泉。水溫泉之水清且漣，凝脂洗盡爭
春妍。初疑滄海浴明月，又如玉井開紅蓮。君王一見
生歡喜，六宮粉黛誰能比。一曲霓裳樂未終，胡塵已
暗三千里。天生尤物徒爾為馬嵬，竟死誰能悲丹青。
一幅半零落千載，君王當鑑之。

鄧伯言玉筍集卷之二

鄧伯言玉筍集卷之三

五言律詩

寄周主事文瞻二首

天上辭榮日山中養道年
閑將玉筍篆寫出白雲篇
夜月蒲萄酒秋風穉稷田
知君有真樂那得共盤旋
寂寞山房裏思君未識君
空瞻一片月還隔幾重雲
伐木鶯求友巢松鶴不羣
物情與人事感歎不堪聞

送知縣曹哲德明美解赴京

家住燕山北官居紫滄潯
三年惟飲水永日祇彈琴

政體吾皇意天知令尹心行看書上考入覲五雲深

題謝氏蘭玉堂

瓊樹三山種幽蘭九畹香移栽宜勝地列映近高堂
自可紉仙佩真堪比玉郎因之懷謝傅幾葉尚留芳

謝友人惠首服

角巾存古制何必華陽求一幅勞相贈千金未足酬
花間堪漉酒松下免科頭迴覺添蕭散逢迎遠俗流

謝子晟惠藤杖

嶺表歸來日枯藤得幾枝情深煩遣贈老去賴扶持

正直能同搯勻員頗中規終當乘暇日拄到謝家池

憶上海令黃子津

獨坐看新月長吟憶故人蟬娟同此夜離別又經春
白髮催人老青山入夢頻無由一相見顧影倍傷神

客館辭歸

鍊冠蕪卉服老去樂清貧流水琴中趣閑雲物外身
竹房留客慣花徑弄孫頻自有幽栖處誼囂頗厭人

題李氏盤谷

幽居似盤谷流水繞柴門意適觀魚鳥年深長子孫

耕耘聊自給理亂未曾聞何日操藜杖從君遠世紛

題張行之竹間亭

偶逢溪上友日造竹間亭路徑通幽寂烟雲入杳冥
坐來清客思題處有僧名最喜安巢鳳朝刷錦翎

挽黃玉潤

未見還堪恨云亡恨更多麟經藏篋笥馬鬣墓山坡
無復蒲輪召空聞薤露歌高風不可仰吾道竟如何

題西門巡檢瞻雲堂大行人

天際秋雲起官居思不任寧同弘景趣還有狄公心
渺々千重白微々萬里陰日之憶親舍遠在大行深

送謝子厚隨父之武昌

落日千山路長風萬里舟親朋憐遠別父子樂同遊
白浪過彭蠡蒼烟望鄂州非耽覽竒勝定省足消憂

題龍伯原桃源小隱

草屋孤邨迥桃花一水深不同潘岳趣還有武陵心
漁父應相問仙家或可尋年々愛春色把酒對芳林

白石硯

一片大古雪窓間猶未融堅凝端石瓦瑩徹水精同

頗怪胚暉異堪誇制作工
斫磨經幾世揮洒對清風
水壺為宋一俊賦

表裏俱澄澈光涵一室中
渾疑廣寒月落在水晶宮
冷沁神仙骨形全造化功
平生愛蕭爽擬入訪壺公

題朱學淵石室山房

石室炎天冷雲窻白晝昏
仙人常對奕詩客屢過門
簷外松千尺琴邊酒一尊
陶然忘世慮不似屬乾坤

莫春同友人觀江漲

江樹雨瀟瀟江波斷板橋
望洋心若失泛艇興偏饒

且共漁竿樂須逃府檄
招白鷗知客意並戲亦飄

清明日掃先墳

已過寒食節况值落花天
對雨情無限思親淚泫然
邛墟迷草莽天地慘風煙
有鳥來何處哀鳴向我前

客中春望有懷永平毛教諭弘濟西安何大

使維翰

青山長不改白髮日偏多
客思迷芳草年華逐逝波
舊交成契闊往事亦蹉跎
西北關山遠相思柰若何

悼亡

蚤歲期偕老中年慨獨存憑棺惟灑淚剪紙莫招魂
令德宜家室深恩及子孫終當求密石為爾表高墳

寄何幼恭

時余失內助幼恭年將五十生子甫及一周而失之俱可慟也

我有悼亡戚君懷無後憂莫年那見此老淚不能收
世事恍如夢江波空自流吟詩聊自遣寄贈若為酌

題曾氏松關白雲

白雲何處宿旦暮曉松關變化能為雨氤氳長在山
濕添枝葉重晴鎖戶庭閑未可自怡悅從今願往還

題周宗祥綠陰清畫堂

手種堂前樹經年長綠陰午風眠處冷晝日坐來深
喜得山林趣能知雅頌音何當分半席蕭爽散塵襟

送徐御史服闋之京

海內賢良士人間孝義兒哀麻初脫後綸綍再徵時
路去金陵遠帆開葛水遲應攀墳上柏洒淚告行期

題淵明畫像

淵明非嗜酒寓意酒杯中大化觀天地閑情對菊松
風流千載上感慨幾人同稽首瞻遺像雲開見華嵩

題張孟憲綠陰棋墅

林園新雨後棋墅夏涼初嘉木蔭窻戶青山成畫圖
機心元不競世事本來疎未問橘中叟斯人仙者徒

題鄧恒吾滄洲漁隱

結屋住滄洲開軒瞰碧流鳥啼烟樹晚風起荻花秋
林酒還堪醉鱸魚亦易求陶然忘世慮天地一虛舟

挽成之錙進士

歲月窮經傳名聲重甲科莫年遭喪亂吾道竟蹉跎
正喜藏修好其如老病何貽文嗟絕筆痛哭望松蘿

挽何同德

一代衣冠士平生鍊石心有才乖世用多難祇愁吟
歲月容華老風霜肺病侵不堪埋玉樹痛哭淚沾襟

晏起

老夫常晏起飯後始梳頭懶慢從人笑清閒得自由
美蔬聊當肉大布可為裘鄰叟時相問農談酒數甌

題錢氏石田書隱

石田春水滿林館白雲多舊業惟耕學閑情託詠歌
地偏宜竹樹檐迴帶藤蘿亦有藏修意何當共琢磨

題王煉師雲巢

石洞還堪隱松雲亦可巢
九真勞夢想五老託神交
混沌含元氣氤氳濕翠梢
醉眠惟伴鶴羣翼任啾啁

送伯良姚君之廣西金城寨巡檢

聖主求賢日將軍領命時
金城煩警邏缺馬正驅馳
日月昭王化弓刀示武威
瘴烟看掃盡嶺表悉平夷

挽丁御史子堅

仕為文章顯名因政事
香泮芹新雨露臺柏舊風霜
往事空流水荒阡幾夕陽
遙知千載後潛德有輝光

何彥徵從軍遼東其父往問曰寄

令子三年戍嚴君萬里行
艱難俱可念相見若為情

遼海悲聞鶴天河願洗兵
尺書將遠意歸馬看升平

山中見梅有懷吟梅老人何幼恭

白髮堪憐我貞姿喜見梅
倚闌成獨笑帶雪為誰開
天地含元氣山林產異材
遙知東閣裏吟賞興悠哉

題陳氏學堂山房

宦族宗秦國山居扁學堂
古今留翰墨草木有輝光
倚劔丹霄近看書白日長
何當借雲榻共話到羲皇

重題

地為人增重山因學著名舊歲書籍在新築草堂成
捲幔通雲氣鳴琴澗聲知君事游息養素薄時榮

過孤山峽

窈窕孤山峽潺湲一澗泉望中如削玉聽處似鳴絃
路轉疑逢虎峯高欲近天恍然得平曠林木數家烟

憶母

獨夜滄洲月清光照膽寒倚闌情脉脉憶母淚漫漫
感慨成千古憂思集萬端那堪聽烏鳥啼到五更殘

寄鄒貢士仲律

故人久不見消息始相聞未說文章進深知行義敦
讀書忘歲月為客信乾坤頭白嗟何補期君共討論

奉和李如愚見寄

老鶴千年壽閑雲一片心乾坤今古事風月短長吟
宦族西平遠仙家玉筍深何當騎白鹿閒暇一相尋

寄贈醫士錨東樵

方書傳幾世丹鼎有神功身在壺天裏民躋壽域中
杏林藏一虎寶匣卧雙龍欲問長生藥螺山隔幾峯

客中有懷何大鏞朱學淵

去歲重陽日曾同醉菊花別來無鴈信望斷惜春華
風雨江亭暮雲山客路餘思君纔入夢厭殺亂啼鴉

客中寄文彬

細雨清明近幽齋白日長懷君當此際為客在他鄉
有恨花隨水無情髮易霜遙知故園竹新笋過隣墻

寄臨江道紀王默淵

聖代興玄教真人領篆章道書藏玉笥官舍倚清江
已羨承恩澤終能肅紀綱驚看斬邪劔每夜吐光芒

題艾子才括蒼吏隱卷

我遊群玉洞君寓括蒼山出處雖殊調心神本共閑
煮蒲居石室收印入松關豈被浮名縛悠然天地間

題百華寺

茲山白雲裏古寺覺城東徑濕莓苔雨窗寒薜荔風
傳經由慧遠洗硯憶陶公暫借禪牀坐心澄萬慮空

吉文羅允瞻作時思堂以祀先而又閔其婦

翁蕭君彝翁死義而無後乃附祭于堂

蕭君死節義羅氏重彝倫禮謹春秋祀恩隆內外親
九京寧有憾兩姓幸相因千載斯堂在聞風亦愴神

寄錙進士伯琛二首

舊交多寂寞高士近何如
白首窮經傳青山繞屋廬
種松招海鶴俯檻愛池魚
養素無榮辱心存太古初
伊昔曾相見論詩一解顏
別來經歲月望斷隔雲山
撫事偏多感逃名且自閑
葛峯多勝蹟那得共躋攀

東邛行素

久別邛行素重逢髮半蒼
世情無係累文物有輝光
歲月宜琴酒乾坤任海棠
相知幾人在萬感集中腸
風雨訪錙孔殷不遇

瀟灑溪上雨浙浙樹間風
擬訪天台客難追葛水蹤
尺書鴻雁遠樽酒父兄同
飲罷題詩去重來意頗濃

宜詠樓

危樓供遠眺髣髴在黃州
翠合羣山晚涼生萬竹秋
古今懷勝蹟天地汎虛舟
此興宜高詠浮名不用求

遊郁木

郁木多朋輩重遊累作期
峽寒霜落早澗曲水行遲
藥擬分瑤草書仍訪墨池
平生耽野趣一到一題詩

寄吳六舅從吾先生

儒名推令族吾舅冠群倫但倚文為富休論病是貧
莓苔深巷雨花木故園春近想多新作猶煩遠寄頻

憶外舅陳姓字懷遠

外舅襄陽遠音書恨未通閔河奔走外鄉國亂離中
暗草江南路晴雲塞北鴻一尊林下酒談咲幾時同

枕上作

夢斷五更時山家雞乳啼風生梧樹裏月過紙窗西
為客心牢落傷時氣慘淒遙憐征戰地萬骨委塵泥

贈別席煥章

風流席子雲游藝最超群卷裏新詩句毫端小篆文
折梅曾寄我看竹又逢君獨有憐才意臨歧不忍分

次玉筍羅提點竹間韻

聞師臥竹陰故我竹間尋稽阮平生趣求羊太古心
月明看鳳宿風起聽龍吟想得題詩處毫端翠色侵

寄姚觀海

白髮感秋風淒涼世事空昔交騎馬客今伴釣魚翁
歲月閑吟裏風塵醉眼中可憐同里閑只是各西東

題陳漢仁雪舫

幽人住城市小屋似扁舟素壁光含雪銀床冷浸秋
乘風慕瑯島釣月憶滄洲同郡多名士相過聽棹謳

鑿井

移家脩竹裏鑿井屋西偏未盡兩日力能通三尺泉
味甘同玉液色湛見青天頗快慈親飲容顏勝去年

贈滿公太虛

杖錫遊方外詩名滿世間相同明月好心似白雲閑
香霧天龍繞松風海雁還知師容入社堂上有慈顏

七夕留屏山館中

去歲山中客曾為七夕吟感時懷往昔守拙到如今
生計田園薄羈愁歲月深不知牛女會還識此時心

題永豐令蔡行素朴實齋

百里安民俗陶然大古風布衣無長物茆屋有焦桐
未覺羲農遠真堪卓魯同何須種黍李桑柘滿城東

哭兄伯讓

生至治丙寅以甲午
歲飢困商遇寇害

重利輕生死哀哉負所天青山空有恨白骨寂無言
忍聽慈親哭誰為弱弟憐幾回風雨夜歎枕淚潺湲

鄒幼亨以召赴京告歸養親因寄二首

之子文章進嚴君德望尊家傳東魯派人說道鄉孫
承詔曾飛動辭歸得清溫聖朝思孝治風俗喜彌敦
水驛曾追送天門又賜歸布衣霑雨露綵服拜庭闈
生計思田里風光說帝畿解裝無長物滿卷燦珠璣

幼亨為錄玉筍集

習隱猶南郭知音似子期不閑塵世事為錄老夫詩
竹映當窗几雲生洗墨池遙憐揮洒處竟日不知疲

秋夜憶陳尚泰

白髮山中叟清秋卷裏詩五言推古淡數月惜分離

鴈過西風急烏啼北斗低懷君當此夜愁絕倚窓扉

暇日閱謝檢校叔賓詩集

北極開薇省東山築草堂斯人兼吏隱盛代有輝光
用法元師漢吟詩更擬唐深慚策駑駘猶欲並騰驤

東江泳思

賣藥同康伯吟詩學少陵驚看寫珠玉郡得備參苓
歲月吾衰老山林子俊英何當種梧樹蚤聽鳳皇鳴

題鄒文彥冰思堂

兵戈有寧日父母無歸時黯黯塞雲遠蕭蕭風木悲

江流千古恨堂樹永思碑亦有先親念詩成不忍題
客歸與舍弟仲言從弟季言宴集

昔別憐桑梓今還撫鞠松入門兒女笑展席弟兄同
歲月全生計衣冠尚古風怡有真樂往事愧飄蓬

寄吳孔文

寒風吹野樹白鴈起汀沙渺々長江去曛々落日斜
半生同作客兩地各思家歲晏吳溪上梅開幾樹花

寄吳嘉靖

明月照江閣北風吹樹林數聲何處鴈兩地故鄉心
夢裏頻相見愁來自不禁歸程須早計莫待歲華侵

追悼先友曾吾忠

憶我年方壯多君學已明往還論古道生死見交情
夜月書窗白春風墓草青不堪揮老泪况復聽猿聲

答錙脩已

獨對山中月秋風正颯然未為攀桂客空學煮蒲仙
鬢髮千絲亂琴書四壁懸故人憐寂寞詩寄白雲邊

次蕭編修用濟韻

新詩煩故友遠寄自城中豈意龍門客能思鶴髮翁

別離塵世換著作古人同
不有知音士誰憐爨下桐
寄九仙觀道士陳子雍

虬髯披鶴氅道氣養丹田
身外元無事山中別有天
姓名仙籍注文字世人傳
我有菖蒲鼎相期煮石泉

題秋林讀書處

江風寒葉落燈火夜窻虛
潭上罷漁釣林中間讀書
沈潜知道味蕭爽得幽居
勗爾抱貞獨榮名何足趨

挽陳長史絲溪二首

蚤歲攻文籍中年樂宦游
儒林有根抵王府贊謀猷

山擁秦城壯雲連玉笥幽
功成身已退底事致愆尤
一死人皆有嗟君獨可哀
金陵歸白骨玉笥失英才
猿嘯悲風急山空古木摧
相過一灑泪明月照蒼苔

題梁園雪景扇面

梁園風景異興逐雪花飛
瑤館東西戶瑤林千萬枝
望中迷舞鶴賞處艷歌辭
枚馬今何在風流見畫師

老去

老去惟踈懶閑來復歎歌
倚樓孤月上隱几好山多
野飯甘藜藿秋衣製芡荷
不堪腰帶減長是病詩魔

寄何叔敬兄弟

一別踰三月相思復幾回
山林多勝事伯仲摠英才
舊集題華鄂新居闢草萊
遙知風月夜綵侍進霞杯
兵後訪西鄉宗族

西鄉喪亂後宗族幾家存
弔古寧無恨分流本共源
紫苔荒舊業喬木尚清門
大傳留祠廟高風百世論

贈相地黃一初

老子雙蓬鬢長年醉復醒
光陰隨鐵杖風雨護龍經
水接江淮白山連華岳
青牛眠何處是為我作畜形

五老慶春圖為子堅題

玉笋傳枰酌新年喜氣多
東風如有約五老適相過
列座衣冠舊相看鬢髮皤
主賓情爛熳談笑眄庭柯
別醫士彭碧清

我愛彭居士蒼顏復古心
醫名著江海隱與在山林
放鶴雲霄遠燒丹歲月深
相逢恐相別把臂欲霑襟

醫士李蕙善歐鄉人持其祖嵩可所編運氣
書一卷乃元吳文正公澄為之序引以示余
余嘉之因題五言四韻于其後

紛々事醫術李氏獨專門學究內經秘心知萬化原
著書忘歲月種杏滿林園村巷懷先哲題詩付後昆

寄醫士李性善

白首攻醫業青山養道心藥爐猶伏火杏樹已成林
歲月仙家永塵氛世慮深欲過龍虎峽相即坐松陰

美邑宰

公姓楊名仁字子山嘉興人廉勤自守政
令嚴肅吏民稱神明不可欺有漢良吏之

風

宰邑承恩命臨民有政聲戴星還出入與水共登清
道為朝廷重心於富貴輕何當告太史卓魯可齊名

上判簿二首

公姓王字宗道通經術有仁政

金川勞簿領政及魯中年善教生民樂除奸鬼魅愁
縣衙春暎草更鼓月當樓公退無餘事群經自校讎
迂闊無生計傭書到白頭歲寒松柏友月俸稻梁謀
出處由天命謳謌樂聖朝承宣當告別春色望龍樓

鄧伯言玉筍集卷之四

國家圖書館, NATIONAL CENTRAL LIBRARY, TAIWAN, R.O.C.



鄧伯言玉筍集卷之四

美新淦曹明府招

聖德如天極海涯
縣公鳧鳥到荒遐
金陵地接二千
里紫淦春回十萬家
按犢庭中飛鳥雀
弦歌城外種
桑麻才名不獨傳
京國庾嶺南來衆口誇

寄毛弘濟時寓玉筍山中

昔年為客厭風沙
長嘯歸來鹿引車
樓上一簾青嶂
雨洞中千樹碧桃花
携琴每訪神仙宅
納履曾辭富
貴家可嘆別離經
歲月寄書長是隔烟霞



菊花枕

采徧東籬一萬叢
繡囊盛取枕秋風
寒香正在頭顱上
粉蝶還來夢寐中
彭澤風流千載舊
邯鄲富貴一時空
讀書未老雙瞳暗
得爾全勝服食功

鍾陵懷古

一聲画角城頭月
吹破鍾陵萬戶秋
南鴈不知天地老
西山猶帶古今愁
滕王閣上驚塵入
孺子臺前戰血流
惟有神君留錢柱
千秋萬歲鎮靈湫

大風詩吹韻

陰壑霜飛應早冬
又拈騷筆賦雄風
山河只在寒聲裏
草莽同歸殺氣中
黯黯塵沙飛白晝
飄飄鷹隼上晴空
曾聞漢主歌豐邑
猛士能成萬里功

清明

落花芳草燕爭飛
寒食清明客未歸
山遠定勞慈母望
地偏真與故交違
十年書劔嗟何補
二頃榛蕪悟昨非
羈思不堪長繾綣
幾回愁絕送斜暉

甲午歲饑民間采薇代粟

庾廩多時劫火焚
凶年黎庶食薇根
青山曉斫雲垂

擔白水宵澄月映盆老婦作成心獨昔嬌兒求飽手
爭捫大官每日饜梁肉此味誰將與細論

東姚觀海

一邨烟火接鄰居來往清波談也自娛顧我只為文
字苦看君不受利名驅松邊亂復成茅屋花外晴來
置酒壺莫恠近年相見少隴頭時復帶經鉏

和艾子材有感

生不逢時柰若何六年喪亂飽經過聞雞自笑劉琨
舞扣角誰憐甯戚歌華屋兵餘芳草合小園春盡落

花多躬畊豈是男兒事勗爾明經赴後科

和龔先之陪定子靜宴臨清樓所作

小隊同遊趣不稀元戎應恨得君遲草肥沙上青驄
馬日絢城頭赤羽旗紫酒臨風娛翠袖膽瓶和露插
花枝幕中賓客如君少橫槊間能共賦詩

和張伯溫秋興三首

知君隱處白雲峯俗意都無在眼中樹底宴酣思卧
石竹間棋罷欲乘風冥心會究天人學老筆能參造
化功稍待塵清無戰伐袖書還謁帝王宮

井梧搖落露溥溥，客子愁懷強自寬。
題柱昔如司馬壯，賦詩今作孟郊寒。
君從廢後榛蕪盛，道至窮時出處難。
安得南州早寧靜，讀書耕稼足為歡。
白雲深處掃莓苔，坐嘯蒲團日幾回。
中野只聞豺虎鬪，北廷那見鳳凰來。
將非李愬參油幕，士儗陶潛託酒杯。
時世不同家業盡，華門斜傍竹籬開。

和陳積中見寄二首

華館春風綺席寬，綠楊斜蔭石闌干。
鶯黃杜酒浮銀瓮，雪白吳鹽出翠盤。
花外筍輿添散逸，行間棋局樂平安。
主人好事能供給，長缺由來不用彈。
麻鞋縈縈布袍寬，世事紛紛摠不干。
泛菊每求陶令酒，盛蔬擬借石生槃。
家貧最喜庭闈健，主聖終期社稷安。
况有故人能慰藉，取琴同坐竹邊彈。

壽陳敏學

聞道巖前九節蒲，服之還可上蓬壺。
不勞更問安期訣，政好閒觀老子圖。
長夏清風生檜柏，老年紅日在桑榆。
有時讌客華堂上，一炷沈烟裊鴨爐。

奉呈族叔

雪灑梅窓酒共斟一時風致百年心杜陵亂後居茅
屋阮籍閒來訪竹林鏡裏不曾看白髮床頭休恨散
黃金古來賢士多貧賤留得聲名直到今

別陳積中

石橋山路雪霏々十里寒梅照客衣宗慤謗懷投筆
去陳搏還喜束書歸萬株松桂烟霞老二頃田園雨
露肥想得故園今夜月弟兄尊酒奉庭闈

奉答陳三選

先生寓隱南溪上絕勝王維住輞川梟々釣絲閑白
日悠々簫管醉涼天松杉午蔭門前路鷺鴨秋盈兩
外田何必更為干祿計詠懷時有白雲篇
犬吠雞鳴宅舍偏武陵風物晉山川玉堂金馬知何
處流水桃花別有天李白豪雄偏愛酒韓公老大欲
求田向來賴寄新珠玉報荅終慚月露篇

和何克敬春行

久別雲林學道人不知何處復相親數聲啼鳥千山
雨萬箇垂楊一市春漁釣昔聞周隱士謳吟今作漢
遺民南隣及見新題在把卷臨風字々珍

題張行之所藏梅竹圖

一幅輕綃寫梅竹幾多清致在毫端
嶺南生意東風早淇上繁陰六月寒
止渴擬求經雨實釣魚曾斬拂雲竿
如今只恨無韋偃添畫青松取次看

奉和曾伯曼韻

廬陵學者皆名流一士隸業韓堂秋
飛騰未得進士舉模範獨許鄉人求
春風童冠樂吟詠莫雨江山懷釣游
近日傳聞避豺虎舉家寄食來吾州

家舅和前韻示余因再用韻奉寄

南郊廟前溪流紫蓋峯下梧桐秋
片雲相隔不可會西屨未閑何所求
荒城厭見豺虎亂深谷喜同麋鹿遊
吾舅安居莫歎息杜陵多難留鄜州

贈相地宋以文

曾把青囊參妙處還令白骨感恩深
山中幸有寬閒地世上誰無富貴心
萬壑松風聞虎嘯五湖烟水聽龍吟
登臨莫怪興亡事花落花開自古今

奉東曾進士得之

翠屏萬仞摩蒼穹下有志士才且雄
讀書不厭一萬

卷食祿猶待三千鍾
大鵬低飛簸海水
老鶴獨立鳴天風
常時慣見車馬客
開館坐對仙巖松

題南山西嶽行祠

山靈昔報熊羆夢
野服重登虎豹闕
萬里青雲渠有待
九重恩命帝仍須
縣崖疊嶂烟霞濕
古木蒼藤雨露閑
欲訪雲儲修煉法
珮聲疑向月中還

走馬燈

絳紗籠子夜通明
戲馬盤迴不暫停
謾想龍媒追電火
恍疑熒惑犯房星
光騰不照關山路
影動還依錦繡屏
多少駑駘空食粟
獨能焜耀使君庭

用韻答謝彥質

謝家池上又逢春
坐見東山氣渾淪
千畝竹松宜獨隱
一簾風月愛清貧
鹿門自可携妻子
宣室毋煩論鬼神
舊業儘隨征戰盡
底須愁嘆似盧綸

雪用家舅從吾先生韻時和者數人

六花飛逐北來風
白戰諸朋各論功
岐路不分夷險處
灞橋那得往來通
光涵萬仞神仙窟
凍合十尋海若宮
欲采黃精迷處所
短衣愁殺杜陵翁

文彬惜前韻見示用隱居之興答之

布衣長日坐松風肥遯慚無濟世功海上欲尋蓬島
去花間疑與武陵通烟霞碧嶂群仙府風雨蒼苔一
畝宮多謝吾宗頻顧問儒生今學采芝翁

迎薰棋墅為張仲倫賦

五畝田廬一澗雲紙屏楸局坐南薰子聲頻向花陰
落爽氣還從樹底分王質看回人弈々有虞歌後世
紛紛君侯不是無心者夜雨燈窗復綴文

送艾錄事赴召

元暉

玉筍山中采藥苗金陵臺上有書招夷齊守義慚周
粟賈董懷才入漢朝鴈背冷雲天漠々馬頭荒草路
迢々不知鳳去曾回否洗耳高臺聽九韶

次韻答陳學之

經年不見陳公子臨眺湖山樂未休海鶴晝歸雲表
樹岸花晴照水邊樓文章自許唐人並曠達須從晉
代求多謝向來詩句好月明思泛剡川舟

送蕭子雅往新喻省墳墓

渝川一水淨如練百丈諸峯高插天喬木半存兵火

後白雲多傍塞鴻邊君從此處尋先隴我寄哀吟吊
昔賢千古文章惟老范石麟埋沒草芊芊

和周德川春夜聽雨

山雨瀟瀟雞亂鳴竹林風起薄寒生斜霑筆架應千
點暗滴苔階正五更樹尾殘花從擺落隴頭嘉穀自
生成只憐未罷東吳戰徧野屍骸不可耕

題梁徵君石門精舍

白雲長鎖石門山翠壁丹崖不可攀千載清風在喬
木九秋清露汎崇蘭衣冠自可同園綺道德猶思述
孔顏莫怪韜光老岳谷幾多膏馥在人間

壽吳六舅從吾先生

扁所居曰
老吟堂

羣玉山連白石莊南箕星照老吟堂盤分碧藕期千
歲律中黃鍾復一陽天地已知吾道長雪霜應任鬢
毛蒼因公却憶磻溪叟八十猶能事釣璜

寄建陽司訓陳允章二首

江亭駐馬曾相別一去甌閩歲月深天上豈無攀桂
手海頭還有釣鰲心典謨擬贊唐虞治翰墨尤工鮑
謝吟亦有近題三百首煩君傳作治時音

玉筍峯前是我家數間茆屋白雲遮
臨池洗硯魚吞墨入洞尋真鹿
引車萬事無心從白首長生有訣服
丹砂期君蚤上朝元閣莫學青門老種瓜

送劉進士允泰赴召

故家文獻春秋學亂後還山卧碧雲
聖代忽聞徵賈誼才名終不負
錙黃六朝帝業山河在萬里天衢雨
露分為報鳳皇臺上客幾人漁釣楚江濱

褚衾用貫酸齋蘆花被韻

褚衾如雪絕纖塵穩卧還須藉布茵
一片白雲松下榻五更明月夢中身
惟應紙帳堪同調祇恐梅華亦笑貧
贏得素風含混沌夜寒一照便回春

山中答友人

曉晴空翠濕衣衫晝靜烟霏接洞巖
茅屋有詩題歲月桃源無路隔仙凡
閑看碧柳常開戶喜斲黃精獨荷錢
多謝故人頻問訊駕駘今幸脫羈銜

別陳自得

四年來往槎溪路踏破溪邊幾片雲
歲晏可憐猶是客情深那忍即辭君
故園梅蕊還相憶後夜猿聲不

可聞我正黑頭君未老一尊他日更論文

廬陵

寺僧玉鑑之母因亂流離不知所

在玉鑑思念不已語及輒流涕乃白佛願長齋十年賣藥以資道里之費求母所在越數月遽得母書而奔走奉迎以歸甘旨無不具嗚呼豈非墨名儒行至孝而感鬼神也哉廬陵之能文者叙其事余亦喜而作詩題其後多年不見親每聞烏鳥動酸辛佳音忽爾傳鄉邑至孝由來感鬼神塵外緇衣惟白業人間綵服適青春知師賣藥營甘旨黃蘗何堪更比倫

寄錙季恭

何君崑上涼如水曾與彈琴坐石床夜久松風吹鬢髮月高花露濕衣裳別來每記當時樂老去終非少日狂何日重尋舊遊處洞仙頻約醉壺觴

毛教諭見過自云薦賢多矣然為國而非為

私也余深美之賦此為贈

字弘齊文江人神童之後

幾人名在薦賢中黼黻期文大有功玉遇卞和應價長馬逢伯樂始群空門前桃李多時滿天下車書以

日同願我無才兼母病不辭茅屋聽秋風

和曾叔子山居韻

盛時樓閣倚岩堯
亂後幽棲興轉饒
晴日捲簾花照地
晚涼吠管鶴冲霄
擬尋黃綺居商嶺
懶學嚴徐入漢朝
明日登臨向何處
看棋應逐洞中樵

廖山立自號海桴賦此為贈

鴈叫西風海國秋
乘行萬里興悠悠
宣尼已去同誰往
徐市應能共子遊
幾向夢中尋閬苑
更於何處辨瀛洲
天邊明月清如許
不載紅塵一點愁

客中有感用韻呈丁御史

百花時節雨踈々
未得還家訓阿符
常恐白頭虛歲月
且將黃卷理蟲魚
長吟慷慨思歸日
舊業蕭條戰伐餘
却羨故人丁御史
題橋不愧馬相如

牡丹用子堅韻

東風微雨過園亭
國色朝酣近玉瓶
銜去只須防白鹿
開時還似綴紅翎
春融幾處繁華地
香逐誰家縹緲
聞道洛陽花更好
滿城如錦照青冥

送道士鄒泰宇祠親後還山

學道山中知幾春，蓼莪詩廢重思親。
還家為奏生天錄，入洞仍隨采藥人。
但使鄉閭稱孝行，不妨林壑寄閒身。
題詩送別情如海，它日烟霞願卜隣。

賀鄧尚之除豐城虞衡

獻賦曾聞上玉京，還鄉人羨錦衣榮。
論交未可輕貧賤，託好由來儼弟兄。
萬里雲霄初發軔，半生湖海却馳聲。
何當便把豐城劍，且跨洪濤斬恠鯨。

癸丑九日重登翠屏山

去年此日屏山飲，醉插黃花一兩枝。
歲月已同駒過隙，江山重待客題詩。
玄崖聳處雲霄近，白鳥飛邊徑路危。
南望故園煙樹隔，慈親應念到家遲。

用子堅九日登高追和杜牧之韻

林下西風赤葉飛，山頭幽徑紫烟微。
鞠華更約明年賞，客子曾孤此日歸。
時序百年懷往事，江山千古帶斜暉。
曾聞神武掛朝服，甘向人間作布衣。

重遊何君巖東王何二高士

紫霄巖畔重遊日，澗水松風五月寒。
潭影靜觀雲漠漠，藤陰危坐石團團。
樵人解識衣冠舊，羽士能留洞

府寬自咲塵緣今未滿幾時同跨月中鸞

何同理和前韻見寄再用韵奉答

月輪初上綵雲端巖穴風生洞府寒直欲仰天攀桂
樹偶然吹笛坐蒲團龍光上屬星辰遠鶴駕東來海
水寬咲問何仙在何許夜深應共女乘鸞

又答婁良器

閒把新詩卷裏看風流不似孟郊寒才高共惜年猶
小別久還驚月又團庭樹葉飛秋思闊塞鴻聲斷海
天寬明朝擬訪嚴君去為說名家有鳳鸞

又答曾彥敬

林下柴門傍水安滿林風露桂花寒層崖聳翠千尋
險明月當空一鏡團雲氣恍疑蓬島近水光猶似鑑
湖寬無窮物色誰能賦同輩文章五色鸞

送家舅吳先生往池州尋子時居虞衡之職

池陽副使心如水玉筍先生鬢若絲千里江湖憐遠
別三年父子費相思微茫暝色沙頭樹慘淡離情卷
裏詩目送雲帆烟水闊梅花開後是歸期

寄何伯善先生二首

華高^蓋峯高聳碧霄先生棲息絕塵囂門前松菊存三
逕事下文章冠六朝雅道久時傳弟子宦情今已託
漁樵相知最恨相從晚悵望雲山百里遙
浮生已入無聞境幾度臨風感慨深朽腐不堪同草
木辛勤猶自惜光陰藏書小結山中屋對月常彈膝
上琴一寸苦心誰為寫先生留墨重千金

夜雨倏霽月色清朗起視天宇悵然有故人
之想遂賦此奉呈婁君仲實為翌日遊巖之

約云

向夕篝燈風雨聲中宵啓戶月華明青天萬里看無
盡旅館三更睡不成才薄豈堪明主用交深長憶故
人情重崑細菊仙家酒明日相期作伴行

奉和丁御史遊南山韻

六石參天頗怪竒白雲深處有靈祠山開萬古烟霞
洞松偃千年雨露枝仙客吹笙同子晉居人學圃愧
樊遲從今此地還增價崖壁長留御史詩

丁御史枉顧山房不遇留題而去依韻奉謝
山中朝來澗水平黃梅雨歇松風清仙翁采藥久忘

世野人卜居聊治生耕烟開放草間犢伐木喜聞林
外鶯繡衣枉駕失迎候賴有小兒知姓名

次丁御史題群玉山房韻

我家舊宅如蜂房移居竹圃安蒲床、頭惟有書劍
在屋裏更無僭石藏靜愛吟詩宗鮑謝閑思開逕接
求羊先生肯作漁樵伴却笑時人逐利忙

壽何編修願夫

馬蹄曾踏燕山雪鶴氅仍棲玉笥雲細閱丹書多道
氣靜隨流水絕塵氛樓前碧嶂松千尺天際涼風鶴
一羣滿引霞杯開綺席綠衣環侍摠能文

題鰲溪廖氏池亭用鄧伯明韻

龍門山中小有天華亭縹緲來飛仙石潭今古浴明
月源水日夜流清川松杉雲表自鬱鬱、蘭菊霜後猶
鮮、天生好景入圖畫何時登覽陪諸賢

寄鰲溪程則敬

龍門山中有奇士杜門不出鬢眉蒼收書隱几窓月
白岸幘坐石松風涼心軒冕慕丹訣志在山水談
青囊相思不見勞夢寐送別賢郎心愈傷

耕樂為豐城徐以觀賦

蚤年勤學著才名晚歲躬畊樂太平
白水滿田科斗出黃雲垂隴鷓鴣鳴
帶經或向桑陰坐飲犢時從澗
畔行自是鹿門堪隱逸只愁天遣使車迎

卧雲窗為簡伯原作

竹床何處宜高臥玉笥西頭有白雲
陰過石欄常縹緲氣通窗隙更氤氳
衣裳潤透秋先到林壑寒迷日
易曛我亦山中卧雲者不思弘景即思君

筠雪齋為豐城黃尚英作

黃家移種瀟湘竹歲晏相看雪滿林
白處恍疑仙鶴立靜中如聽老龍吟
冰凝翡翠清無敵人倚琅玕冷
不禁何日雪中逢老可臨風一筆直千金

寄高博士允憲

天上曾聞博士徵山中每憶故人情
文章禮樂當時重富貴功名一羽輕
老去定知添白髮退歸那得服
黃精思君冰夜瞻天象還應微垣第幾星

送孫昌言之官廣東

十年勤苦抱遺經留得崑東映雪亭
獻賦已趨雙鳳

闕之官又向五羊城西風落日傷離別瘴雨蠻烟待
掃清莫道遐荒淹雋軌隱之曾此著嘉名

寄曾孫稼劉彥文二公俱授徒清江

蚤聞曾氏傳忠恕復憶錨幾置墨莊喬木至今齊閔
閱衆星猶自煥文章兩家託好絲蘿舊百里携書道
路長為寫新吟寄飛鴈莫雲翹首意蒼茫

挽何仲疇

南朝人物數君家異代興衰一歎嗟獨羨中流存砥
柱那知清骨葬烟霞詩書在笈從兒讀翰墨留香與
世誇重過東橋堪洒淚春風吹落墓前花

挽婁仲實

翰墨論交四十年客中聞訃獨潛然懷才祇向空山
老繼志終看令子賢萬卷詩書存舊業千年松柏表
荒阡欲知化鶴遊何處玉筇峯頭訪十仙

用韵答何大鏞朱學淵

才俊紛紛總入朝此生祇合老漁樵春秋未解窮三
傳大學徒能究八條物外無心超世網閒中有味酌
山瓢故人亦肯憐幽獨尋訪頻能過石橋

寄周存誠

百花寺裏曾相問，報道携琴正出遊。
惆悵不知何日會，蹉跎又是兩星周。
黃蘆白鴈官洲月，古木寒藤玉笥秋。
兩地相思千疊意，不堪吟倚夕陽樓。

謝胡廷琛惠智永千文及藤杖

數載論交樂有餘，眼中高誼更無如。
藤分九節堪扶老，帖賜千文許學書。
燕子日長揮翰墨，桃花春暖步郊墟。
臨風感佩殷勤意，欲報瓊瑤乏所儲。

贈鄭山人

千里江山一瘦筇，幾多佳勝在胸中。
神蹤不閱牛眠處，古墓猶存馬鬣封。
金盃玉魚追往事，黃鸝碧艸自春風。
登臨不用懷傷感，萬古金陵氣鬱葱。

曾尚迪見訪失迎又辱寄詩奉答

懶慢無堪不出關，喜觀書卷倦登山。
偶尋芝朮穿雲去，却伴漁樵帶月還。
客至未同今日會，鶴歸相對老夫閑。
來詩細把燈前讀，有約重論足慰顏。

何大韶見訪偶出失迎留題而去用韻答之

道人采藥不曾閑，朝訪南山莫北山。
豈意軒車能遠

出却過蓬華竟空還石泉未得同清賞詩句能題慰
老顏自是陽春真寡和妙音還在盛唐間

題款膳部歸隱卷

承詔曾趨玉几前蕭蕭白髮許歸田誰知鼎鼐調羹
手却校雲林種樹篇琴霍共消閒日月樓臺長挹舊
山川朝廷有道尊年德優賜行看下九天

題廖善立攬聖樓

層構巍峩傍水涯幾陪名勝躡仙梯九秋風月鈎簾
處百里江山注目時黃鶴每當瑤席舞白雲時遶画
梁飛知君老去風流在長日簪花醉玉卮

寄西鄉同宗尚志

喬木千章倚碧雲幾回西望祇思君舊家文獻今猶
昔百世衣冠子又孫遠道每憐難會面高秋還擬一
過門寄詩謾寫殷勤意水木當知共本源

送內弟吳子充之福州竹木場大使

萬疊雲山赴七閩一官猶似舊時貧朝廷不是勞征
伐梁棟由來屬選掄芳草綠時兄送弟荔枝紅處子
思親傍人莫笑干微祿毛義終為孝行人

送何端夫西遊

數聲寒鴈楚天秋，目送雲帆萬里遊。
海宇只今無戰伐，山川是處入吟謳。
曾聞鑄劍成干莫，祇恐乘槎犯斗牛。
我欲隨君慚倦翼，夢魂飛到海西頭。

寄嶧縣主簿鄒應端

會稽山水天下奇，縣舍還聞對剡溪。
雲合四山環翠色，月明一棹弄清漪。
官閑不盡登臨興，道遠寧無故舊思。
最喜素藤明似雪，因風好寄近題詩。

寄胡彥清彥忠昆季

伯仲才華邁等流，明時未許老林丘。
行看一鶚橫霄漢，已見雙龍射斗牛。
剪燭每懷良夜宴，棹船難共此時遊。
相思目送南飛鴈，腸斷西風起別愁。

寄王鍊師時中

道人家住玉山隈，繞屋青松一萬栽。
六月檄龍天上去，九秋騎鶴月中回。
能揮寶劍除妖魅，解使靈臺絕點埃。
何日携琴一相訪，洞門春暖碧桃開。

寄曾主簿伯曼

玉筍山前話別離，臨風猶記把征衣。
莫雲悵望如千里。

里夜雨重論復幾時風急楚天寒鴈過月明崖樹老
猿啼知君自得烟霞趣一度登臨一賦詩

和北平檢校謝叔賓

小年曾擬上幽燕老去仍棲玉笥前種秫欲求田二
頃窮經初學禮三千畫閑樹影琴邊落夜靜溪聲枕
上傳寂寞山房求賦詠思君點檢白雲篇

丁巳十月余偕鞠孟端曾伯曼龍恒泰姚子
南子深從弟彥章遊玉笥夜宿法樂洞天分
韻得仙字

涉澗捫蘿入洞天冷風吹面鬢蕭然白雲屋壁三千
丈劫火邛壚二十年喜有丹書藏石室肯留詩客卧
松煙夜深月冷聞天樂疑是瑤臺宴十仙

題道士陳玉京奉旨降香卷

代祀霍山羞壁幣退歸玉笥卧烟霞洞天明月一雙
鶴澗水碧桃千樹花寶匣藏龍騰紫氣藥爐伏火養
丹砂長生有道誰能似歲々朝元玉帝家

次錨觀瀾為題群玉山房韻

自咲鄙夫耽野趣結茆相對白雲岑蒼苔古木門前

路明月清風世外心倚劍秋高看鶴舞吹簫夜半作
龍吟故人若許來相訪祇向棲霞谷口尋

送何同倫携家之武昌尋弟

令弟久為湖廣客好音還到淦江城一家十口相從
日萬水千山送別情黃鶴樓高明月滿翠屏山好莫
雲橫知君此去難重會後夜相思百感生

挽紹蘭長老

齊已才名自不群遠公禪學更無倫曾同寺裏看明
月忍向山中哭白雲法相本空心自悟去來無礙道
長存誰知一滴曹溪水洗盡人間萬劫塵

次胡仲宣題山房韻

澗上漁樵隴上耘此身甘與鹿麋群白雲冉冉峯頭
見流水泠泠竹下聞崖石倚天猶鍊色莓苔經雨自
花紋勞君遠寄山中詠絕勝天葩吐異芬

和何質夫見寄

我遊群玉烟霞洞爾愛東橋水竹居兩地共憐風景
好十年真與世情疎秋風白酒岩前菊夜雨青燈案
上書多謝向來貽錦字至今光彩照茅廬

寄廖縣丞止信

遠樹微茫帶白雲，可堪離思日紛紛。
數千里外聞歸隱，二十年餘不見君。
陶令蕪田今種秫，杜陵樽酒擬論文。
何時一訪梅花處，坐挹清風愜素聞。

所居扁有梅花處

用韻答黎時高

白雲紅樹晚晴餘，客子憑闌嘆索居。
搖落又驚時序改，衰遲已覺鬢毛疎。
囊收枸杞還堪服，架束溪藤久廢書。
多謝故人能下榻，幾回高枕似吾廬。

為曾指揮題漢文帝細柳營勞軍圖

門深細柳未曾開，持節方知大駕來。
天上恩光明日月，營中號令肅風雷。
匡扶帝業非兒戲，竦動天顏羨將才。
千載功名見圖畫，臨風還拂舊塵埃。

簡黎祥叔

長身如鶴臉如霞，俯仰乾坤傲歲華。
京國壯遊成舊夢，滄洲小隱似仙家。
鳴琴夜對尊前月，携杖朝尋洞里花。
我欲從君玩竒寶，玉堂詞翰最堪誇。

學士歐陽圭齋危公

太朴有詩文贈之

洪武壬戌夏六月詔徵天下賢良赴京擢用

雅以非才例蒙郡舉而適嬰疾病乃懇辭既
歸辱親故枉問賦此為謝并述鄙懷

秋風蕭颯鬢毛衰懷抱無因得好開林壑獨棲嗟已
老朝廷三聘愧非才乞歸幸遂邛園樂問訊多煩故
舊來謾寫新吟謝知己不妨共醉菊花杯

題嚴氏水竹居

清江一上足田廬獨愛嚴家水竹居林合翠光浮几
席池分清潤倒階除參差夜月棲鸞鳳蕩漾春風戲
鯉魚何日臨流一題詠琅玕節下為君書

春望和黎時高韵

俯仰人間歲月流偶同春望興悠悠
桃花掩映東西岸烟水微茫上下舟
白酒香生茆店裏黃鸝聲在樹
枝頭錦袍年少誰家子走馬看花樂未休

贈醫師湯謙亨

汴梁未住葛溪濱南渡衣冠子又孫
見說醫傳十六世不知功活幾千人
縣壺物外乾坤小種杏雲中雨露均
莫向明時甘隱遯宣和曾著舊功勳

其遠祖平叔宋宣和

官間醫

寄郭都事就覓藤杖

屏山分首經年別，嶺海休官幾日還。
富貴已看榮故里，恩威尤喜化諸蠻。
馬援薏苡何須載，陶令金英自可餐。
老我平生惟隱遯，擬求藤杖共看山。

送永豐曾仲省赴召

螢窗苦學擅才名，鶚表橫蜚被寵徵。
白髮千絲憐我老，青雲萬里壯君行。
文章盛代宗西漢，日月中天屬大明。
入覲宜陳治安策，賜官應校石渠經。

寄黎子謙

抱琴曾訪碧山阿，回首西風別恨多。
謝眺詩情元不減，杜陵肺氣近如何。
投閑慎勿憂餘事，養性偏宜飲太和。
况喜山中有芝朮，不妨頻采入烟蘿。

送鄧吾貫往山東覲省

二十年餘隔清溫，三千里外奉晨昏。
關河不憚驅馳苦，天地難忘鞠育恩。
卷裏贈言勞柱史，山東衣綵拜轅門。
嚴君若問家鄉事，松菊依然滿故園。

滄洲秋夜對月

長年為客寓滄洲，時序堪驚興頗幽。
明月正當書館

夜西風先動桂林秋
乘槎萬里思河漢
倚劍三更望斗牛
老去尚餘豪氣在
浩歌聲落大江頭

挽曾隱君大雅

生長屏山孝義門
兩朝文物古風存
菊松長日為賓主
詩禮平生教子孫
每喜從君論雅道
不堪揮淚吊孤墳
傷心最是山頭雀
飛去飛來為失群

挽曾主簿伯曼

曾承恩命佐殊邦
多病歸田檢藥囊
玉樹忍看埋土壤
朱絰無復奏宮商
千金子壯心何恨
萬卷書存業

未荒惆悵舊遊今已矣
山房題詠墨猶香

挽廖縣丞止信

盛時文物晉風流
天上歸來雪滿頭
富貴十年成往事
衣冠千古葬荒邱
騎龍無復朝雙闕
跨鶴猶疑在十洲
一曲哀歌兩行淚
飄零遺藁付誰收

無後有集曰
竹素園稟

題從弟彥彰擁翠樓

樓倚東南萬疊山
捲簾山勢盡迴環
天開圖畫烟雲裏
風引笙竽竹樹間
詞客燕酣歌嬾
仙人飛過珮珊珊
能修五鳳詩
韓洎愧我才
踈鬢欲斑

御史丁公子堅與余為金石交而經歲不面
殊抱快、甲子冬公重遊玉筍留舊館信宿
既去余始自外歸為之悵然賦詩寫情因錄
奉寄

壯節高標御史公雄文佳句盛唐風蜚騰已羨同鵬
鷲離別那堪似燕鴻窻外月明梅自發甕頭春暖酒
偏濃無山一遂重論約翹首東南望葛峯

送姚公獎往吉安府學從丁先生讀書

螺山雲白鷺洲晴送爾携書赴郡城庠序共談新禮
樂弦歌仍是舊師生劔藏寶匣光猶見玉遇良工器
始成老我無庸還拭目圖南指日化鯤鵬

送姚孟才往淮安省親

寧親遠向淮安去把卷臨風索我題豈有才華當世
重深知孝行古人齊江日天落雙鴻遠沙草秋高萬
馬肥聖代祗今多雨露將車應值放還時

荅石室朱學淵

萬疊峰巒翠湧波君居石室興如何雲迷老樹棲玄
鶴雨過平池泛白鷺看奕已驚塵世換衛生猶喜古

方多何時一訪烟霞裏徙倚丹崖共嘯歌

和丁御史子堅夏夜作

暗水無聲傍竹流棲禽未定忽啁啾月當虛牖終深夜風入高松似早秋壯節有懷丁御史舊家空憶漢諸侯文章黼黻山房重一榻蕭然也自由

寄錙尚書子高

幾回獻賦登青瑣一笑還山卧紫烟誥命已榮天子賜文章猶重世人傳玄都任種桃千樹栗里宜耕秫滿田久仰高名詩盛業却慚踈懶負華年

和何大韶韻

白雲深處結茆廬門掩松筠宿雨餘正爾尋仙遊洞府不知騎馬到階除莓苔未埽經行跡蕉葉仍留去後書近辱貽詩多好語始知名下士非虛

送陳伯良之京

蚤歲從師入泮宮盛年獻策吐丹衷九天雨露期沾沐萬國衣冠喜會同用世政須談禮樂銷兵已見樂耕農朋游闕下如相問白髮蕭々左耳聾

山中和黎時高

學道猶疑隔兩塵，仙葩采徧萬山春。
丹崖翠壁清高地，野服黃冠自在人。
跨海未騎千歲鶴，燒丹還養百年身。
知君亦有求仙意，群玉峯頭日可親。

挽李次晦

曾向天門聽珮珂，復歸林麓卧烟蘿。
家聲舊說西平後，堂構新成玉笥阿。
止喜菊松娛晚節，不堪歲月抱沉疴。
脩然一去成千古，四海朋游涕泪多。

答外甥吳克善惠硯

吾甥遠寄端溪石，留向窗間伴老吟。
試墨已看生黑霧，傳家尤勝蓄黃金。
一泓潤澤食元氣，半世研磨用我心。
携到玉堂須有分，老人期望後人深。

雪中眺望

雲暗江南萬里天，雪寒邨落幾家烟。
梅花不辨溪頭樹，鶴駕虛迎海上仙。
已喜乾坤消沴氣，佇看田野樂豐年。
閉門不作袁安卧，驢背吟詩擬浩然。

小樓閑眺

江上歸來歲又殘，倚樓無事祇看山。
筠松暝合微茫外，霧靄晴分紫翠間。
靜處乾坤真可樂，浮生塵土復

何顏舉頭忽見丹霄鶴載我游仙也未難

江上歸山中訪友

曾向烟波弄釣船復歸茅屋聽潺湲閑情一片宜松竹白髮千絲照簡編物外乾坤逢泰運山中風雪度殘年興來更把枯藜杖尋訪梅花洞裏仙

題醫師王允中松下對奕圖

曾向松根斲茯苓更依松影對楸枰延齡有待三千歲勝敵何須十萬兵動靜死生元自識功名富貴本來輕爛柯莫問當年事看取金丹九轉成

寄姚玄齋兼柬陳學正

杏花時節喜相過蓬鬢蕭蕭醉臉酡把臂欲留情更苦掉頭不注意如何江山是處堪游覽風月何人共嘯歌間說南隣有幽趣白雲千頃竹成坡

姚公觀瀾被里人誣訟死于金陵作詩哀之
雙桂樓前不忍過思君惟有淚成河朋游自此相知少世事從前未悟多玉筍冷猿啼樹裏金陵白骨返山阿一時憤死千年恨茅茹相連柰柰何

暇日蒙子玉見招得陪諸君子燕飲歡甚大

醉中放浪形骸之外而不自知也因自述一
詩并作解嘲云

六十行年兩鬢衰秋風吹老芙蓉衣白雲黃鶴堪為
友流水青山總是詩物外游心如太古人前索笑似
嬰兒坐中不着踈狂士那得諸公一解頤

九日

去年此日還為客今歲重陽暫到家黃菊不堪簪白
髮西風休更落烏紗新芻蟻甕何妨醉舊事龍山亦
可誇佇立蓋峯千仞表無窮幽思接烟霞

藤杖為友人賦

老藤絕勝江心竹嶺表分來九節完落手有聲鏗瓜
甲化龍無意作波瀾百年歲月堪扶老萬里山川得
縱觀亦擬穿雲采靈藥相邀拄到九真壇

采菊

客中底事又還家自引童孫采菊花亂葉不堪兼瑣
碎繁英最喜得精華繡囊滿襯香生枕金醖輕浮色
映霞明目絕勝滄枸杞延年何必煉丹砂

送陳仲蕙翰賦

江上梅花萬樹開送君東上鳳皇臺九天閶闔風雲
會千里舟車貢賦來雨露無私霑草木朝廷有道用
賢才此行不負青年志袖惹天香得意回

挽陳敏恭

天地同生即弟兄可憐未識爾先傾白雲黃葉空山
暮落日西風過客清往事不堪同幻夢流泉猶自帶
哀聲從來賢達皆知命祇恨庭闈隔死生

夢故妻

歲晏江鄉夢故妻夢回愁絕聽鳴雞菱花不照雙鸞
舞松月誰憐一鶴棲黃葉故山埋骨地白頭孤枕悼
亡詩傷心最是門前水嗚咽長流無盡時

寄永豐教諭戴正心

戴君掌教恩江上正是皇朝全盛時文化今漸極南
北才名久著浙東西雲霄萬里瞻丹闕庠序三年坐
絳帷但使英才登俊造莫嗟微祿久淹遲

鄧伯言玉筍集卷之五

七言物體

寄石門梁先生

山中講道當隆平時人共說梁五經諸生長年沐化
雨賤子獨夜瞻文星石門天清一鶴遠玉筍雲歛諸
峯青明年容我操几杖擬乞文字留芳馨

江上有懷謝檢校叔賓

江樹歷々江風清獨立相思無限情功名期子上麟
閣烟波老我尋鷗盟杜陵長吟悲白髮謝安久處憂



蒼生行看三載脫哀經遙望五雲朝玉京

用何玄之韻寄何叔敬兼柬劉子博

渺然離思縈煩襟思君子兮在雲林吹簫石上老蛟
舞采藥雲中幽鳥吟亭臺有酒秋月白門巷無塵春
草深因風為問錨子博學有餘閒時見臨

寄錨子泰

十年不見錨隱居閉門讀盡山中書固知風月滿懷
抱還想雪霜侵鬢須江山遠隔離思苦鴻雁不來音
問疎何時訪我群玉洞共拂崑花傾酒壺

山中對月有懷高文升

山月皎々山風清石泉竹根流細聲故人一月不會
面賤子此夜難為情援琴再彈調更苦舉杯強飲愁
還生是身安得生羽翼奮飛直到文江城

題吉水王氏山間

六月二日遊山間山人為我開雲闕清風一榻對松
竹明月九霄聞珮環壺觴日娛賓客集城市不往軒
車間知君養鹿樂栖遯故我抱琴常往還

東張伯川

同郡能詩張伯川，妙思湧出如春泉。昔年曾作刀筆吏，此日復種桑麻田。松花釀酒醉明月，荷葉製衣眠紫烟。山中風景自可樂，祇恐束帛來爓。

次韻荅黎元復

幽人卜居誰與隣，坐對青山忘世紛。茹芝欲學黃綺輩，生世幸逢堯舜君。綸巾鶴氅靜觀易，繭紙烏絲開綴文。相看又是數年別，事業日進過前聞。

贈一村道人

山中有一邨道人，蕭然布衲烏紗巾。心將白業付孫子，坐對青山忘主賓。嘯歌終日泉石趣，呼吸大和天地春。吾儒妙解三教理，不須更說西來因。

同里姚觀瀾昆弟新樓詩以賀之

姚家兄弟無與儔，前後突兀成高樓。棣華春日自相照，燕子東風還獨留。八窗雲氣連玉筍，四壁圖畫看瀛洲。若非仙骨寧好此，祝君小住三千秋。

哭同邑何先生敬修因追悼曾侍郎得之

前年祖送曾禮部，此日又吊何先生。文章傳世如不死，德義持身俱可稱。五橋流水自鳴咽，翠屏落月猶

淒清哀歌一曲別千古二老有知那忍聽

夜宿孤山次王永安韻

四山陰、雲氣昏杖藜偶出遊南邨故人邀我啓蓬
戶清夜置酒盈匏樽菊松泉石自可賞富貴功名安
足論人生所貴在勤學明日讀書還閉門

余鼓琴山中常恨無知音者鍾期既遇奏流
水以何慙乃借大鑪韻賦詩一首以寫琴中
之趣并奉諸君一笑云爾

天風蕭、吹樹林石泉冷、清我心呼兒洒掃舊節
屋坐石拂拭焦桐琴鍾期自可聽流水季子何用誇
黃金故人於我喜同調為君彈作蒼龍吟

楚王府典寶鄧尚忠訪余叙宗族之好詩以
贈之

江風蕭、江樹枯使君走馬尋郊居不嫌野老守貧
賤肯同草坐論詩書鐙前斗酒暫為樂天上丹心思
遠圖我家功業著漢代勗哉善保千金軀

鄧伯言玉筍集卷之五

國家圖書館, NATIONAL CENTRAL LIBRARY, TAIWAN, R.O.C.



鄧伯言玉筍集卷之六

五言長律

奉餞外舅之襄陽

外舅襄陽去江南草綠時夕陽沙上酒舊雨卷中詩
雲斷吳天隔舟行楚岸移浩歌明月上長嘯遠風吹
到想春將盡居應地最宜鹿門深草木漠水淨鳧鷖
龐老神仙宅羊公德政碑覽竒應有作感舊莫生悲
六矢男兒事千金賈客噴此行雖特達早發故園思

題吳仲亨種德堂

種德由先世承家見後人才名終不忝醫學更無倫
崖石靈芝秀庭階玉樹新緣資培養力始見發生仁
焚券非求譽縣壺足養真銜珠蛇不異守杏虎常馴
浩蕩乾坤大涵濡雨露均清朝榮祿養堂上綵衣春

西菴畔叟為姚觀海賦

南徼風塵久西菴日月長健兒從戰伐垂老事耕桑
蔓草勤須剪松醪渴易嘗把書晴護麥看雨暮移牀
翠竹連蔬圃寒泉帶柳塘石闌風浙瀝雲谷樹蒼茫
牛犢侵晨牧豺狼入夜防烟霞成痼癖神物致休祥

龐老身無恙陶潛興不忘蒲葵添散逸筇竹任徜徉
了事輸租稅無憂足稻粱文尋高士傳詩詠甫田章
既識浮生理須求不老方勗哉加飲膳擊壤待時康

蕭氏東隱

其曾祖之號

舊隱依東郭高風仰昔人棟梁經幾世文物見諸孫
書學蕭雲艸家非原憲貧田園深雨露籬落帶松筠
涼月琴尊夜朝曦戶牖春鳥啼知節序燕寢適寒溫
耕鑿當平世詩書裕後昆何須慕軒冕俯仰信乾坤

夜宿黃氏山莊

為愛溪山好來游
趨晚涼淡烟芳草徑
華屋白雲庄
環合峯千疊
陰森樹兩行
製衣思薜荔
濯足愛滄浪
地勝囂塵遠
居幽興味長
移床風滌暑
展席月流光
共說青囊秘
頻分紫筭香
明朝携竹杖
重與望前岡

送進士

昔記王洲別
今看萬里行
赤心歸聖主
白首濟蒼生
名為文章著
時逢海岱清
從容談禮樂
次第取公卿
日月明金殿
鶯花繞鳳城
遙知公退暇
細閱石渠經

重題黃伯原友鶴軒

幽軒誰作伴
老鶴日相親
起舞能娛客
飛來不避人
雪霜明羽翮
風月助精神
豈羨乘軒貴
曾看度海頻
神仙元是友
鸞鳳可為隣
警露聲何遠
摩霄志不群
物情殊品類
人道共彝倫
一曲南飛調
因之更祝君

鄧伯言玉筍集卷之七

七言長律

寄劉隱君雲莊

前代衣冠數二劉，雲仍幾葉學弓裘。
吟詩自可傳千里，習隱惟聞守一邱。
門外竹松還引徑，花間池沼更通流。
歲修有道書連屋，富貴無心雪滿頭。
久喜孫登同嘯傲，却如顏闔避徵求。
冥鴻一去雲霄迥，白鷺孤飛島嶼幽。
對月想彈流水操，乘風未汎剡川舟。
相思日夕情如海，何日芳尊話倡酬。

題白沙陳氏翠竹間

千畝何須說渭川白沙翠竹尚依然
偶從深處開三徑似覺高風繼七賢
長夏清陰宜枕簟四時佳興寓
觴絃繞檐迴覺紅塵遠巢鳳爭看彩羽鮮
待長龍孫應萬箇欲裁汗簡可千年
知君浩有淇園想題徧琅玕復幾聯

挽鄒主簿應端

青楓江上結愁雲一曲哀歌淚滿中
富貴昔年成底事山川何處弔孤墳
茫茫天地無窮恨耿耿心懷莫
共論明月未歸華表鶴高風寧羨北溟鵬
鯤半身生世才名誤萬卷詩書手澤存
令子承家親尚健衣冠仍數道鄉門

寄張助教美和

聖主無為萬國清先生歸隱一身輕
寵榮百世留宸翰辛苦平生在聖經
閉戶日長恒著述杖藜身老尚逢迎
吟看碧嶂清江雨夢繞紅樓紫禁城
四皓已能成遠業二疏還可並高名
朝廷自昔尊者舊鄉邑如今重典刑
遠想風流嗟未識獨慙踈懶苦無成
風騷

謾效當時體韶濩猶懷太古聲俯仰乾坤同此道睽
離南北復何情寄思為說相思意更約山中煇茯苓

輓劉廉使楚奇

白鷺青原鍾淑氣鳳皇芝草見禎祥朝廷有道需才
傑嶺海無虞佐憲綱暫假風霜清瘴癘祇將忠孝感
穹蒼歲寒共喜堅松柏世事那知變海桑慷慨捐軀
探虎穴淒涼歸骨塋螺岡忠魂萬古留遺恨潛德千
年有耿光許遠不忘唐社稷蘓卿猶著漢文章哀歌
有盡情無盡稍、悲風起白楊

輓曾侍郎得之

聖主求賢問治安先生承詔起江干百年事業存經
濟萬里雲霄振羽翰制作盡稽周典禮風流不減晉
衣冠丹墀奏對天顏近画省論思月色寒道學每期
千載重文章底用後人看病思啓篋焚遺藁詔許還
山別上官記就玉樓仙夢遠粉書丹旆客心酸祠堂
萬古屏山麓松柏叅天集鳳鸞

贛芋知事希曾十韻

臨江知事揚州客漂泊風塵歷歲年老大獨憐雙鬢

改亂離兼喜一家全山中寓隱從門掩松下遨遊任
履穿經雨欲鉏栽竹地夕晴思引灌花泉明來問字
能携酒客至求詩每費賤政譽已聞天上有才名姑
與郡中傳飛騰萬里曾如願留滯三年暫息肩貧似
杜陵收橡粟興同彭澤憶蕪田黃麻有待恩光及白
屋深期惠澤宣感激為公歌此曲異時相率共留鞭

楊花用丁御史韻

綠楊堤上起鮮飈無數飛花映日嬌稍近樓臺度簾
幙忽霑杯斝絢瓊瑤灞陵吟望春偏好彭澤行尋路
匪遙照眼適同張緒態多情渾似小蠻腰輕隨戲蝶
飄隣圃急送遊人過市橋村白不禁芒履踏店香須
赴酒家邀難收弱絮從衣薄錯認柔絲把髮撩搖蕩
度江千萬里顛狂辭樹兩三朝殘春莫恠猶飛雪明
日重看定化藻底是詩人頻賦詠繡衣曾惹上丹霄

鄧伯言玉筍集卷之八

七言絕句

玉筍十詠

曾柏曼命題

玉筍晴雲

三十六峯香難分
上有佳氣常氤氳
安得良工拂絹
素畫我山中
眠白雲

紫葢春雨

紫葢突兀青天位
老鶴結巢松樹枝
坐看山色淨如
染正是東風過雨時

何君駕虹

紫霄何年駕綵虹三十萬里登瀛蓬至今岩洞有遺蹟
蹟碧桃爛熳搖春風

石人翫月

望夫化石千古名翫月如人千古清梅花峯上月皎皎
皎此物無情如有情

雙林蓮社

尋僧幾向山中來芒鞋踏破青苔雙林絕似東林好
好亦有白蓮無數開

孤山梅隱

孤山：中小有天時有隱者來盤旋梅花如雪千萬
樹徙倚月下懷連仙

綿峯瀑布

誰拖素練千尺長乃是絕壁飛流淙上人洗鉢坐崖
石慣聞水樂鳴鏗鏘

繭溪澄練

繭溪下從西北流明月正照蘆花秋光涵映一匹練
練天地與我同虛舟

南祠夢閣

化龍樓閣成墟邛世人無夢登瀛洲倦來偶枕松下
石天風六月涼如秋

東嶽行宮

岱宗如何齊魯青魯侯昔祭山之靈江淮遠隔數千
里空山落木看祠庭

題秋月上人所藏洞庭秋月圖

君山木落洞庭秋今古無窮水自流明月一輪天宇
靜定中疑是泛虛舟

雪

一夜天花滿世間群峯失却翠雲鬟何由騎得仙家
鶴看遍東南萬玉山

題扇

林間樓閣護烟霞門外山僮掃落花小澗石橋人緩
步抱琴來此訪仙家

題昭君圖

一曲琵琶千種恨百年圖畫幾人看君王不是無恩
寵海宇因之得奠安

閒居

一林修竹滿庭陰
四壁圖書太古心
俯仰乾坤觀物理
悠然魚鳥自蜚沉

題觀海圖

滄溟之深幾千丈
萬頃鏡面涵空虛
何不翻身入海底
九重淵內探驪珠

題畫扇

青松掩映白雲間
雲自無心我自閒
靜聽松聲作琴響
孤鸞別鶴不須彈

為吳叔昌題畫扇

山中老樹半榮枯
烟際茆亭似有無
白髮兩翁携稚子
衣冠疑是列仙徒

客夜

芙蓉葉上雨瀟瀟
一盞殘燈照寂寥
久客不堪鄉思苦
誰家兒女又吹簫

洞簫吹徹思悠悠
雲散江天月滿樓
倚徧闌干風露冷
數聲孤雁落滄洲

采蓮曲

粉黛粧成宮樣新
汗凝微澹紫羅巾
絕憐來往西湖
上貪看荷花不顧人
綠荷深處水生波
三五蘭舟載綺羅
華月漸明風漸
息吳人愁聽越人歌

賦謝仲寧紙帳

溪藤百幅淨如練
裁作斗帳同君清
覺來滿洞白雲
起耳畔更聽松風聲

重遊何君有感

板橋流水石磯平
幾度經行酒半醒
試問隔堤楊柳
樹為誰搖落為誰青

哭出家從祖德林真人

萬里天風送珮珂
一邛烟雨暗松蘿
傷心二十四澗
水不及諸孫涕泪多

對桐樹

丈夫志氣頗英豪
流落茲山歎未遭
却羨翠桐門外
樹小窻坐見出簷高

鄧伯言玉筍集卷之八

國家圖書館, NATIONAL CENTRAL LIBRARY, TAIWAN, R.O.C.



鄧伯言玉筭集卷之一

朝京紀行

應

制賦鍾山雲氣沍寒詩首句乃

御製也

沍寒雲鴻濛維時屆嚴冬乾坤既定位造化乃有功
聖人昌國運父老歌年豐鰲足立四極鍾山蟠一龍
風雲常變化草木自葱龍帝德邁三五君門深九重
金陵勢佳麗芒碭氣鬱葱永世立基業群經知統宗

華夷遵教化臣子效精忠三誥比謨典萬幾思始終
憂民至懇切論道每從容田野被林澤閭閻還古風
咨詢及耆老歌舞效兒童承詔上金殿命題勞聖衷
臣才實蹇澁臣貌復龍鍾豈有涓埃報深知眷顧隆
上林春欲動大地雪猶封何物柰寒氣青々萬年松

早朝

九重城闕五雲中萬國衣冠拜袞龍道德仰瞻天地
大車書復見古今同鳳皇地暖春先動鳩鵲樓高雪
正融頭白趨朝沾聖澤幾回吟對萬年松

贄周參議

名倬字雲章豐城人

秘閣曾看萬卷書文章政事近無如豐城兩劍降妖
魅北極諸星拱帝居海宇無疆歸正統朝廷有道用
真儒攀龍直到九天上附驥何當萬里餘涸轍久思
求活計侯門那得曳長裾春風倘借吹噓力寒谷春
生槁朽蘇

新淦曉發

淦水東頭曉發舩邑人爭看去朝天老人星現當平
治聖主恩深被寵宣身到九重依日月路經千里越

山川此行得遂平生志歸課兒孫種秫田

南津夜泊

南津橋頭明月多客舫夜泊發謳謔五更霜寒聞畫
角千里帆開揚素波朝廷有道恤耆老天地無私舍
大和妙音佇聽奏韶濩九重城闕高嵯峨

晚宿清江

金鳳洲前落日低清江城下泊船時白頭總是朝天
客黃柳齊攀繫纜枝萬里雲霄悲旅鴈千家砧杵搗
寒衣明朝擬拜黃堂守却駕天風去似飛

泊樟鎮謁寶金山

清江之水清悠悠行人發棹江之頭封溪晚泊集千
艇寶金晨謁登層樓山川感慨今古事草木變衰天
地秋我來再拜何所祝四海永清蒙帝休

晨起

曾從玉洞看雲松又向金門拜袞龍四海豈無青眼
士滿船俱是白頭翁夜瞻斗柄天旋左朝望扶桑日
上東最喜太平今有象賜歸何幸樂年豐

到江西

朔風吹鴈不成行，獨起掀篷思渺茫。
萬里青天看北斗，數聲柔櫓下西江。
滕王舊閣何年廢，孺子高名百世香。
我欲題詩紀形勝，氣衝牛斗筆如杠。

欲到豐城不果

可惜豐城地，船中瞥眼過。
樓臺新雉堞，戎馬舊山河。
龍劍知誰得，虬鬚柰何。
老臨風，屢回首，重到恐蹉跎。

孺子亭觀東湖

西山含夕照，征棹泊鍾陵。
未上滕王閣，先遊孺子亭。
士今留勝跡，江海寄閑情。
試問東湖水，何人此濯纓。

滕王閣

天下幾多奇絕處，滕王獨愛此淹留。
山瞻廬岳九千丈，地控荆蠻十二州。
天上星辰分翼軫，閣中風景目春秋。
朱簾畫棟非疇昔，江水依然萬古流。

鐵柱觀

鐵柱井中央，蛟龍久遁藏。
神功配天地，劍氣厲風霜。
世已除妖孽，仙猶託混茫。
應知萬古為國鎮，西江

樵舍

樵舍臨江滸，柴門數十家。
驛亭依柳樹，客棹泊汀沙。

歲晏風霜肅天長道路賒舟師告羣老十日到京華

昌邑山

水落江心正人行岸脚斜祠神過水府倚棹近漁家
飲啄宜沙鳥漂流愧客槎戍兵嚴警邏為報上京華

望湖亭

鄱陽水落一片仄練廬阜雲開九疊屏不是坡仙有題
詠老夫無意上湖亭

望湖亭讀坡仙詩景仰高風重題四韻

不識眉山蘓學士望湖亭上憶高風心胸自可吞彭

蠡眉宇何如見華峯舊日題詩留篆刻平生為國守
精忠文章千古誰能似湖水滔二日向東

吳城山

西湖水落天風寒維舟又上吳城山禪林樓閣爛金
碧洞府神仙鳴佩環浩二乾坤寬眼界二鸞鶴下
雲間登臨正樂催行急詔許龍墀趨曉班

吳城山聽碧山上人講法華經

飄二空裏落天花靜聽山僧講法華我亦平生無住
着白雲深處即為家

星子縣阻風

冬十二月朝天関我船正泊星子灣祈靈已謁晏侯
廟舉目更望匡廬山風濤洶湧阻行色歲事崢嶸悲
旅顏是身安得生羽翼飛上九天渾未難

鄱陽阻風

廬阜干岩雪鄱陽萬里風驚看白頭浪愁殺白頭翁

廬山

五老擎天壓厚坤江南惟有此山尊干岩樓閣多仙
佛四面峯巒似子孫飛瀑恍疑銀漢落懸崖時有白

雲屯何當獨跨山頭鶴萬里飄飄朝帝閣

過彭蠡

東湖水西湖水日夜流匯彭蠡揚闌左里何渺茫萬
頃鏡面含天光廬山高聳湖水上屏風九疊倒影湖
中央湖光山色兩奇絕翠靄丹霞互明滅夜深明月
落波心疑是驪龍吐珠光燁燁湖水復湖水滔々流
向東何當載我上京國却尋五老巢雲松

九江口

路出九江口山瞻五老峯天飛鶴鶴浪暖化魚龍

極目微茫外揚帆浩蕩中觀流問源委巴蜀此相通

夜泊南康

向夕繫扁舟南康湖水頭角聲雲外響燈影浪中搖
漂泊憐衰鬢謳歌答聖朝北風阻行色明發待齊橈

湖口

縣舍臨湖口僧居倚石岩路斜通柳市風急挂蒲帆
異境堪圖畫同舟共笑談爭知種田者頭白着征衫

彭澤

山通彭澤縣天設海門關方水瀦清濁千艘渡險艱

望洋今日歎承詔幾時還欲訪陶潛宅聞風有愧顏

采石

蛾眉亭上奏朱絃采石江邊月滿舡惆悵謫仙何處
在醉中猶伴老龍眠

采石酒樓

采石江頭問酒家酒樓兒女貌如花金杯滿勸歌聲
緩銀燭高燒舞影斜

觀潮有感

潮去潮來朝復暮
花開花落雨兼風
由來萬化皆消

長惟有青山今古同

太白墓

嗚呼李太白今古詩之豪心胸自可小溟渤富貴何
如輕羽毛平生所樂在詩酒醉來筆湧春江濤貴妃
捧硯足榮寵天子賜之宮錦袍風流既往不復見
殘膏賸馥沾吾曹吾曹碌々不足數采石江頭拜詩
祖當年捉月事渺茫千載清風一坏土

安慶弔青陽先生于廷心

江雲淡々江水清弔古又上舒州城青陽先生不可

見群玉山人空復情一門骨肉死貞節于古文章留
姓名高風激烈孰能比李黻守譚當並稱